

欽定金史

目錄  
卷一  
之三

金史百

世又齋

光緒癸卯冬十月  
五洲同文局石印

御製改譯遼金元三史序

改譯遼金元三史成司事者以  
序請史無序例也齊梁陳書及  
後五代乃有序蓋出於宋臣修  
史者剏為之飾例也亦足以觀  
其政之不綱而事之紛紊也若

今三史之請序將比於孰乎曰  
彼之序皆序其事而此之序乃  
序其言則不可以齊梁等比之  
矣序其言亦非為之修辭飾說  
乃改譯漢文譯其國語之訛誤  
者至於其國制度之理亂君臣

之得失未嘗一字易蓋史者信也所以傳萬世垂法戒彼其時之史或已不能保其必信數百年之後無庸為之修飾且改譯者不過正其訛誤之語而其舊史之布天下者自在也讀史者

執舊簡而證以新書則可知語  
之異而事之同則此序之不可  
不作乃所以明吾志也夫春秋  
一字之褒貶示聖人大公至正  
之心若遼金元三國之譯漢文  
則出於秦越人視肥瘠者之手

性情各別語言不通而又有謬  
寓嗤斥之意存焉此豈春秋一  
字褒貶之為哉向於改譯三史  
之旨及同文韻統熱河志諸序  
已屢言之茲不復綴夫遼金雖  
稱帝究屬偏安元雖一統而主



中華者纔八十年其時漢人之  
為臣僕者心意終未決洽我國  
家承

天庥命建極垂統至於今百四  
十年矣漢人之為臣僕者自其  
高曾逮將五世性情無所不通

語言無所不曉且今之纂修諸  
臣即有善通清書兼習諸國字  
之人則茲三史必當及此時而  
改譯其訛誤者是則吾於遼金  
元三代實厚有造而慰焉雖然  
是造非吾造乃

御製詩經卷之三  
四  
天造我國家重熙累洽而後得  
此則所以祈

天永命日慎一日之忱惟益兢  
兢懼乃勝於慰焉云耳

乾隆四十六年冬月

臣董誥奉

勅敬書

欽定四庫全書總目提要

金史一百三十五卷

元托克托等奉敕撰凡紀十九卷志三十九卷表四卷列傳七十三卷金人肇基東海奄有中原制度典章彬彬為盛徵文考獻具有所資即如大金弔伐一錄自天輔七年交割燕雲及天會三年再舉伐宋五年廢宋立楚至康王南渡所有國書誓誥冊表文狀指揮牒檄以載於故府案牘者具有年月得以編次成書是自開國之初即已遺聞不墜文藝傳稱元好問晚年以著作自任以金源氏

有天下典章法制幾及漢唐國亡史作已所當任時金國實錄在順天張萬戶家乃言於張願為撰述既因有阻而止乃構野史亭著述其上凡金源君臣遺言往行採摭所聞有所得輒以片紙細字為記錄至百餘萬言纂修金史多本其所著又稱劉祁撰歸潛志於金末之事多有足徵是相承纂述復不乏人且考托克托等進書表稱張柔歸金史於其前王鶚輯金事於其後是以纂修之命見諸敷遺之謀延祐申舉而未遑天厯推行而弗竟是元人之於此書經營已久與宋遼二史取辦倉

卒者不同故其首尾完密條例整齊約而不疎瞻而不蕪在三史之中獨為最善如載世紀於卷首而列景宣帝睿宗顯宗於世紀補則酌取魏書之例厯志則採趙知微之大明厯而兼考渾象之存亡禮志則掇韓企先等之大金集禮而兼及雜儀之品節河渠志之詳於二十五埽百官志之首敘建國諸官咸本本元元具有條理食貨志則因物力之微而歎其初法之不慎選舉志則因令史之正班而推言仕進之末弊交聘表則數宋人三失而惜其不知守險不能自強皆切中事機意存殷

鑒卓然有良史之風惟其列傳之中頗多疎舛如楊朴佐太祖開基見於遼史而不為立傳晉王宗翰之上書乞免見北盟會編潘王宗弼之遺令處分見建炎以來繫年要錄皆有關國政而本傳不書海陵之失德既見於本紀而諸嬖之猥褻復詳述於后妃傳王倫以奉使被留未嘗受職而傳列於鄜瓊李成之後張邦昌傳既云宋史有傳事具宗翰等傳而復復引本紀之文列於劉豫之前皆乖體例至昌本之南走施宜生之泄謀宇文虛中之謗訕傳聞異辭皆未能核定亦由於祇據實錄

未暇旁考諸書然宋史載兩國兵事多採摭宋人所記不免浮詞如采石之戰其時海陵士卒聞大定改元離心自潰虞允文攘以為功殊非事實此書所載獨得其真泰和以後諸臣傳尤能悉其情事蓋好問等得諸目覩與傳聞異詞者殊也卷三十三卷七十六中有闕文蓋明代監版之脫誤今以

內府所藏元版校補仍為完帙云

翰林院檢討臣孫廷翰恭錄



石印

金史目錄

元中書右丞相總裁脫脫等修

本紀十九卷

志三十九卷

表四卷

列傳七十三卷

凡一百三十五卷

金史卷一

本紀第一

世紀

金史卷二

本紀第二

太祖

金史卷三

本紀第三

太宗

金史卷四

本紀第四

熙宗

金史卷五

本紀第五

海陵

金史卷六

本紀第六

世宗上

金史卷七

本紀第七

世宗中

金史卷八

本紀第八

世宗下

金史卷九

本紀第九

章宗一

金史卷十

本紀第十

章宗二

金史卷十一

本紀第十一

章宗三

金史卷十二

本紀第十二

章宗四

金史卷十三

本紀第十三

衛紹王

金史卷十四

本紀第十四

宣宗上

金史卷十五

本紀第十五

宣宗中

金史卷十六

本紀第十六

宣宗下

金史卷十七

本紀第十七

哀宗上

金史卷十八

本紀第十八

哀宗下

金史卷十九

本紀第十九

世紀補

金史卷二十

志第一

天文

金史卷二十一

志第二

歷上

金史卷二十二



金史目錄  
四  
志第三

歷下

金史卷二十三

志第四

五行

金史卷二十四

志第五

地理上

金史卷二十五

志第六

地理中

金史卷二十六

志第七

地理下

金史卷二十七

志第八

河渠

金史卷二十八

志第九

禮一

金史卷二十九

志第十

禮二

金史卷三十

志第十一

禮三

金史卷三十一

志第十二

禮四

金史卷三十二

志第十三

禮五

金史卷三十三

志第十四

禮六

金史卷三十四

志第十五

禮七

金史卷三十五

志第十六

禮八

金史卷三十六

志第十七

禮九

金史卷三十七

志第十八

禮十

金史卷三十八

志第十九

禮十一

金史卷三十九

志第二十

樂上

金史卷四十

志第二十一

樂下

金史卷四十一

志第二十二

儀衛上

金史卷四十二

志第二十三

儀衛下

金史卷四十三

志第二十四

輿服

金史卷四十四

志第二十五

兵

金史卷四十五

志第二十六

刑

金史卷四十六

志第二十七

食貨一

金史卷四十七

志第二十八

食貨二

金史卷四十八

志第二十九

食貨三



金史卷四十九

志第三十

食貨四

金史卷五十

志第三十一

食貨五

金史卷五十一

志第三十二

選舉一

金史卷五十二

志第三十三

選舉二

金史卷五十三

志第三十四

選舉三

金史卷五十四

志第三十五

選舉四

金史卷五十五

志第三十六

百官一

金史卷五十六

志第三十七

百官二

金史卷五十七

志第三十八

百官三

金史卷五十八

志第三十九

百官四

金史卷五十九

表第一

宗室

金史卷六十

表第二

交聘上

金史卷六十一

表第三

交聘中

金史卷六十二

表第四

交聘下

金史卷六十三

列傳第一

后妃上

始祖明懿皇后

德帝思皇后

安帝節皇后

獻祖恭靖皇后

昭祖威順皇后

景祖昭肅皇后

世祖簡翼皇后

肅宗靖宣皇后

穆宗貞惠皇后

康宗敬僖皇后

太祖聖穆皇后

太祖光懿皇后

太祖欽憲皇后

太祖宣獻皇后

太祖崇妃蕭氏

太宗欽仁皇后

熙宗悼平皇后

海陵嫡母徒單氏

海陵母大氏

海陵后徒單氏

諸嬖附

金史卷六十四

列傳第二

后妃下

睿宗欽慈皇后

睿宗貞懿皇后

世宗昭德皇后

世宗元妃張氏

金史卷六十五  
世宗元妃李氏

顯宗孝懿皇后

顯宗昭聖皇后

章宗欽懷皇后

章宗元妃李氏

衛紹王后徒單氏

宣宗皇后王氏

宣宗明惠皇后

哀宗徒單皇后

金史卷六十五

列傳第三

始祖以下諸子

始祖子幹魯

德帝子輩魯

安帝子謝庫德

孫拔達

謝夷保

子盆納

謝里忽

獻祖六子

昭祖子烏古出

跋黑

玄孫崇成

本名僕灰

景祖子劬孫

子蒲家奴

麻頗

子謾都本

謾都訶

世祖子幹帶

幹賽

子宗永

幹者

孫璋

昂

本名吳都子鄭家

金史卷六十六

列傳第四

始祖以下諸子

穆宗子勗

本名烏也子崇秀

康宗子隈可



宗室胡十門

合住

子布輝

攔保

衷

本名醜漢

齊

本名掃合

木魯

胡石改

宗賢

本名阿魯

撻懶

卞

本名吾母

膏

本名阿里刺

奔

本名三寶

阿喜

金史卷六十七

列傳第五

石顯

桓赦

弟散達

烏春

溫敦蒲刺附

臘醅

弟麻產

鈍恩

留可

阿疎

奚王回离保

金史卷六十八

列傳第六

歡都

子謀演

冶訶

子阿魯補

骨赧

訛古乃

蒲查

金史卷六十九

列傳第七

太祖諸子

宗雋

本名訛魯觀

宗傑

本名木里也

宗強

本名阿魯

爽

本名阿鄰

可喜

阿瑣

宗敏

本名阿魯補

元

本名常勝

金史卷七十

列傳第八

撒改

宗憲

本名阿懶

習不失

宗亨

本名塔不也

宗賢

本名賽里

石土門

忠

本名迪古乃

習室

思敬

本名撒改

金史卷七十一

列傳第九

幹魯

幹魯古勃堇

婆盧火

吾札忽

闍母

宗叙

本名德壽

金史卷七十二

列傳第十

婁室

活女

謀衍

仲 本名石古乃

海里

銀朮可

穀英

本名撻懶

麻吉

子沃側

拔里速

習古廼

金史卷七十三

列傳第十一

阿离合懣

晏

本名幹論

宗尹

本名阿里罕

宗寧

本名阿土古

宗道

本名八十

宗雄

本名謀良虎

阿鄰

按荅海

希尹 本名谷神

守貞 本名左廡

守能 本名胡刺

金史卷七十四

列傳第十二

宗翰 本名粘罕  
子斜哥

宗望 本名幹离不  
子齊 京 文

金史卷七十五

列傳第十三

盧彥倫 子璣  
孫亨嗣

毛子廉

李三錫

孔敬宗

李師夔

沈璋

左企弓

虞仲文

曹勇義康公弼附

左泌

弟淵  
姪光慶

金史卷七十六

列傳第十四

太宗諸子

宗磐

本名蒲盧虎

宗固

本名胡魯

宗本

本名阿魯  
蕭玉附

杲

本名斜也

宗義

本名李吉

宗幹

本名幹本

充

本名神土懣  
子檀奴等

永元

本名元奴

究

本名梧桐

襄

本名永慶

袞 本名蒲甲

金史卷七十七

列傳第十五

宗弼 本名兀朮

亨 本名孛迭

張邦昌

劉豫

撻懶

金史卷七十八

列傳第十六

劉彥宗

劉萼

劉筈

劉仲誨



劉頴

時立愛

韓企先

子鐸

金史卷七十九

列傳第十七

酈瓊

李成

孔彥舟

徐文

施宜生

張中孚

張中彥

宇文虛中

王倫

金史卷八十

列傳第十八

熙宗二子

濟安

道濟

斜卯阿里

突合速

烏延蒲盧渾

赤盞暉

大臭

本名塔不也

磐

本名蒲速越

阿离補

子方

金史卷八十一

列傳第十九

鶻謀琶

廸古迭

阿徒罕

夾谷謝奴

阿勒根沒都魯

黃擱敵古本

蒲察胡蓋

夾谷吾里補

王伯龍

高彪

溫廸罕蒲里特

伯德特里補

耶律懷義

蕭王家奴

田灝

趙賊

金史卷八十二

列傳第二十

郭藥師

子安國

耶律塗山

烏延胡里改

烏延吾里補

蕭恭

完顏習不主

紇石烈胡刺

耶律恕

郭企忠

烏孫訛論

顏蓋門都

僕散渾坦

鄭建充

烏古論三合

移刺溫

蕭仲恭子拱

蕭仲宣

高松

海陵諸子

光英

元壽

金史目錄  
矧思阿補

廣陽

金史卷八十三

列傳第二十一

張通古

張浩

張汝霖

張玄素

張汝弼

耶律安禮

納合椿年

祁宰

金史卷八十四

列傳第二十二

杲

本名撒离喝

耨盪溫敦思忠

子乙迭

溫敦兀帶

奔睹

高楨

白彥敬

張景仁

金史卷八十五

列傳第二十三

世宗諸子

永中

永蹈

永功

子壽

永德

永成

永升

金史卷八十六

列傳第二十四

李石 子獻可

完顏福壽

獨吉義

烏延蒲离黑

烏延蒲轄奴

烏延查刺

李師雄

尼厯古鈔兀

孛术魯定方

夾谷胡刺

蒲察斡論

夾谷查刺

金史卷八十七

列傳第二十五

紇石烈志寧

僕散忠義

徒單合喜

金史卷八十八

列傳第二十六

紇石烈良弼

完顏守道

本名習尼列

石琚

唐括安禮

移刺道

本名趙三  
子光祖

金史卷八十九

列傳第二十七

蘇保衡

翟永固

魏子平

孟浩

田穀附



梁肅

移刺慥

移刺子敬

金史卷九十

列傳第二十八

趙元

移刺道

本名按

高德基

馬諷

完顏兀不喝

劉徽柔

賈少冲

子益

移刺幹里朶

阿勒根彥忠

張九思

高衍

楊邦基

丁暉仁

金史卷九十一

列傳第二十九

完顏撒改

龐迪

溫迪罕移室懣

神土懣

移刺成

石抹卞

楊仲武

蒲察世傑

本名阿撒

蕭懷忠

移刺按荅

孛術魯阿魯罕

趙興祥

石抹榮

敬嗣暉

金史卷九十二

列傳第三十

毛碩

李上達

曹望之

大懷貞

盧孝儉

盧庸

李偲

徒單克寧

本名習顯

金史卷九十三

列傳第三十一

顯宗諸子

琮

瓌

從彝

從憲

玠

章宗諸子

洪裕

洪靖

洪熙

洪衍

洪輝

忒鄰

衛紹王子

從恪

宣宗三子

莊獻太子

玄齡

守純

獨吉思忠

承裕

僕散揆

抹撚史挖搭

宗浩

金史卷九十四

列傳第三十二

夾谷清臣

內族襄

夾谷衡

完顏安國

瑤里孛迭

金史卷九十五

列傳第三十三

移刺履

張萬公

蒲察通

粘割斡特刺

程輝

劉瑋

董師古

王蔚

馬惠迪

馬琪

楊伯通

尼厖古鑑

金史卷九十六

列傳第三十四

黃久約

李晏

李仲畧

李愈

金史卷九十七  
列傳第三十五  
王賁

許安仁

梁襄

路伯達

金史卷九十七

列傳第三十五

裴滿亨

韓勒忠

張大節

子巖叟

張亨

韓錫

鄧儼

巨構

賀揚庭

閻公貞

焦旭

劉仲洙

李完

馬百祿

楊伯元

劉璣

兄琬

康元弼

移刺益

金史卷九十八

列傳第三十六

完顏匡

本名撒速

完顏綱

本名元奴

完顏定奴

金史卷九十九

列傳第三十七

徒單鎰

賈鉉



孫鐸

孫卽康

李革

金史卷一百

列傳第三十八

孟鑄

宗端修

完顏閭山

路鐸

完顏伯嘉

术虎筠壽

張煒

高竑

李復亨

金史卷一百一

列傳第三十九

承暉

本名福興

抹然盡忠

僕散端

本名七斤

耿端義

李英

孛術魯德裕

烏古論慶壽

金史卷一百二

列傳第四十

僕散安貞

田琢

完顏弼

蒙古綱

必蘭阿魯帶

金史卷一百三

列傳第四十一

完顏仲元

完顏阿鄰

完顏霆

烏古論長壽

完顏佐

石抹仲溫

烏古論禮

蒲察阿里

奧屯襄

完顏蒲刺都

夾谷石里哥

术甲臣嘉

紇石烈桓端

完顏阿里不孫

完顏鐵哥

納蘭胡魯刺

金史卷一百四

列傳第四十二

納坦謀嘉

鄒谷

高霖

孟奎

烏林荅與

郭俟

溫廸罕達

王擴

移刺福僧

奧屯忠孝

蒲察思忠

紇石烈胡失門

完顏寓

幹勒合打

蒲察移刺都

金史卷一百五

列傳第四十三

程案

任熊祥

孔璠

子拯

范拱

張用直

劉樞

王脩

楊伯雄

兄伯淵

蕭貢

溫迪罕締達

張翰

任天寵

金史卷一百六

列傳第四十四

張緯

張行簡

賈益謙

劉炳

术虎高琪

塔不也

金史卷一百七

列傳第四十五

高汝礪

張行信

金史卷一百八

列傳第四十六

胥鼎

侯摯

把胡魯

師安石

金史卷一百九

列傳第四十七

完顏素蘭

陳規

許古

金史卷一百一十

列傳第四十八

楊雲翼

趙秉文

韓玉

馮璧

李獻甫

雷淵

程震

金史卷一百一十一

列傳第四十九

古里甲石倫

內族訛可

撒合輦

強伸

烏林荅胡土

內族思烈

紇石烈牙吾塔

金史卷一百一十二

列傳第五十

完顏合達

移刺蒲阿

金史卷一百一十三



列傳第五十一

完顏賽不

白撒 一名承裔

赤蓋合喜

金史卷一百一十四

列傳第五十二

白華

斜卯愛實 合周附

石抹世勣

金史卷一百一十五

列傳第五十三

完顏奴申

崔立

聶天驥

赤蓋尉忻

金史卷一百一十六

列傳第五十四

徒單兀典

石蓋女魯歡

蒲察官奴

內族承立一名慶山奴

金史卷一百一十七

列傳第五十五

徒單益都

粘哥荆山劉均附

王賓王進等附

國用安

時青

金史卷一百一十八

列傳第五十六

苗道潤

王福

移刺衆家奴

武仙

張甫

靖安民

郭文振

胡天作

張開

燕寧

金史卷一百一十九

列傳第五十七

粘葛奴申

劉天起附

完顏婁室

烏古論鎬

張天綱

完顏仲德

金史卷一百二十

列傳第五十八

世戚

石家奴

裴滿達

忽覲

徒單恭

烏古論蒲魯虎

唐括德溫

烏古論粘沒合

蒲察阿虎迭

烏林荅暉

蒲察鼎壽

徒單思忠

徒單繹

烏林荅復

烏古論元忠

子諠

唐括貢

烏林荅琳

徒單公弼

徒單銘

徒單四喜

金史卷一百二十一

列傳第五十九

忠義一

胡沙補

特虎雅

僕忽得

酬幹附

粘割韓奴

曹珪

溫迪罕蒲覲

鶴壽等附

訛里也

閏孫史大等附

納蘭綽赤

魏全

鄯陽

石古乃附

夾谷守中

石抹元毅

伯德梅和尚

烏古孫兀屯

高守約

和速嘉安禮

王維翰

移刺古與涅

宋展

烏古論榮祖

烏古論仲溫

九住

孛果速附

李演

劉德基

王毅 牛斗附

王晦

齊鷹揚

楊敏中張乞驢附

木甲法心

咬查刺等附

高錫

金史卷一百二十二

列傳第六十

忠義二

吳僧哥

烏古論德升

張順

馬驥

伯德宏哥

奧敦醜和尚

從坦

郭用附

孛术魯福壽

吳邦傑

納合蒲刺都

女奚烈幹出

王謹附

時茂先

溫迪罕老兒

梁持勝

賽不等附

賈邦憲

移刺阿里合

孔祖湯附

完顏六斤

紇石烈鶴壽

蒲察婁室

女奚烈資祿

趙益

侯小叔

王佐

黃摑九住

烏林荅乞住

陀滿斜烈

尼厖古蒲魯虎

兀顏畏可



兀顏訛出虎

粘割貞

金史卷一百二十三

列傳第六十一

忠義三

徒單航

完顏陳和尚 斜烈附

楊沃衍 劉興哥附

烏古論黑漢

陀滿胡土門

姬汝作

愛申 馬肩龍附

禹顯 張邦憲等附

金史卷一百二十四

列傳第六十二

忠義四

馬慶祥

胥謙等附

商衡

木甲脫魯灰

楊達夫

馮延登

烏古孫仲端

烏古孫奴申

阿虎帶等附

蒲察琦

蔡八兒

毛佺等附

溫敦昌孫

納坦胡失打附

完顏絳山

畢資倫

郭蝦蟆

金史卷一百二十五

列傳第六十六

文藝上

韓昉

蔡松年

子珪

吳激

馬定國

任詢

趙可

郭長倩

蕭永祺

胡礪

王競

楊伯仁

鄭子聃

党懷英

金史卷一百二十六

列傳第六十四

文藝下

趙颯

周昂

王庭筠

劉昂

李經

劉從益

呂中孚

張建附

李純甫

王儼

宋九嘉

龐鑄

李獻能

王若虛

王元節

麻九疇

李汾

元德明

子好問

金史卷一百二十七

列傳第六十五

孝友

溫迪罕幹魯補

陳顏

劉瑜

孟興

王震

劉政

隱逸

褚承亮

王去非

趙質

杜時昇

郝天挺

薛繼先

高仲振

張潛

王汝梅

宋可

辛愿

王子可

金史卷一百二十八

列傳第六十六

循吏

盧克忠

牛德昌

范承吉

王政

張奕

李瞻

劉敏行

傅慎微

劉煥

高昌福

孫德淵

趙鑑

蒲察鄭留

女奚烈守愚

石抹元

張毅

趙重福

武都

紇石烈德

張特立

王浩

金史卷一百二十九

列傳第六十七

酷吏

高閻山

蒲察合住

伎幸

蕭肄

張仲軻

李通

馬欽

高懷貞

蕭裕

胥持國

金史卷一百三十

列傳第六十八

列女

阿鄰妻

李寶信妻



韓慶民妻

雷婦師氏

康住住

李文妻

李英妻

相琪妻

阿魯真

撒合輦妻

許古妻

馮妙真

蒲察氏

烏古論氏

素蘭妻

忙哥妻

尹氏

白氏

聶孝女

仲德妻

寶符李氏

張鳳奴附

金史卷一百三十一

列傳第六十九

宦者

梁琬

宋珪

潘守恒附

方技

劉完素

張從正

李慶嗣

紀天錫

張元素

馬貴中

武禎

子亢

李懋

胡德新

金史卷一百三十二

列傳第七十

逆臣

秉德

本名乙辛

唐括辯

烏帶

大興國

徒單阿里出虎

僕散師恭

本名忽土

徒單貞

李老僧

完顏元宜

紇石烈執中

本名胡沙虎

金史卷一百三十三

列傳第七十一

叛臣

張覺

子僅言

耶律余睹

窩斡

金史卷一百三十四

列傳第七十二

外國上

西夏

金史卷一百三十五

列傳第七十三

外國下

高麗

欽定金國語解

金九帝起太祖收國元年乙未盡哀宗天興三年甲午百二十年

金史目錄

進金史表

開府儀同三司上柱國錄軍國重事中書右丞相監  
修國史領經筵事提調太醫院廣惠司事臣阿魯圖  
言竊惟漢高帝入關任蕭何而收秦籍唐太宗卽祚  
命魏徵以作隋書蓋歷數歸真主之朝而簡編載前  
代之事國可滅史不可滅善吾師惡亦吾師矧夫典  
故之源流章程之沿革不披往牒曷蓄前聞維此金  
源起於海裔以滿萬之衆橫行天下不十年之久專  
制域中其用兵也如縱燎而乘風其得國也若置郵  
而傳令及燭興於禮樂乃煥有乎聲明嘗循初而汙

終因考功而論德非武元之英略不足以開九帝之業非大定之仁政不足以固百年之基天會有吞四海之勢而未有壹四海之規明昌能成一代之制而亦能壞一代之法海陵無道自取覆敗宣宗輕動曷濟中興迨夫浚郊多壘之秋汝水飛煙之日天人屬望久有在矣君臣守義蓋足取焉我太祖法天啓運聖武皇帝以有名之師而釋奕世之愾以無敵之仁而收兆民之心勁卒擣居庸關北拊其背大軍出紫荊口南搃其吭指顧可成於雋功操縱莫窺於廟算懲彼取遼之暴容其涉河以遷太宗英文皇帝席卷

雲朔而徇地并營囊括趙代而傳檄齊魯滅夏國以  
蹴秦鞏通宋人以徧河淮睿宗仁聖景襄皇帝冒萬  
險出饒風長驅平陸戰三峯乘大雪遂定中原太陽  
出而燭火燿正音作而衆樂廢爰及世祖聖德神功  
文武皇帝恢弘至化勞來遺黎燕地定都撤武靈之  
舊址遼陽建省撫肅慎之故墟于時張柔歸金史於  
其先王鶚輯金事於其後是以纂修之命見諸敷遺  
之謀延祐申舉而未遑天歷推行而弗竟臣阿魯圖  
誠惶誠懼頓首頓首欽惟皇帝陛下緝熙聖學紹述  
先猷當邦家閒暇之時治經史討論之務念彼泰和



以來之事蹟涉我聖代初興之歲年太祖受帝號於丙寅先五載而朱鳳應世皇毓聖質於乙亥蚤一歲而黃河清若此真符昭然成命第以變故多而舊吏闕耆艾沒而新說訛弗折衷於大朝恐失真於他日於是聖心獨斷盛事力行申命臣阿魯圖以中書右丞相臣別兒怯不花以中書左丞相領三史事臣脫脫以前中書右丞相仍都總裁臣御史大夫帖睦爾達世臣中書平章政事賀惟一臣翰林學士承旨張起巖臣翰林學士歐陽玄臣治書侍御史李好文臣禮部尚書王沂臣崇文太監楊宗瑞爲總裁官臣江

西湖東道肅政廉訪使沙刺班臣江西湖東道肅政  
廉訪副使王理臣翰林待制伯顏臣國子博士費著  
臣祕書監著作郎趙時敏臣太常博士商企翁爲史  
官集衆技以責成書佇奏篇以覽近監臣阿魯圖仰  
承隆委俯竭微勞紬石室之文誠乏司馬遷之作獻  
金鏡之錄願摠張相國之忠謹撰述本紀十九卷志  
三十九卷表四卷列傳七十三卷目錄二卷裝潢成  
一百三十七帙隨表以聞上塵天覽無任慚愧戰汗  
屏營之至臣阿魯圖誠惶誠懼頓首頓首謹言至正  
四年十一月日開府儀同三司上柱國錄軍國重事

進金史表  
中書右丞相監修國史領經筵事提調太醫院廣惠  
司臣阿魯圖上表

進金史表

修金史官員

領三史事開府儀同三司上柱國錄軍國重事中書  
右丞相監修國史領經筵事阿魯圖開府儀同三  
司上柱國錄軍國重事中書左丞相領經筵事別  
兒怯不花

都總裁開府儀同三司上柱國錄軍國重事前中書  
右丞相監修國史領經筵事脫脫

總裁官銀青榮祿大夫御史大夫知經筵事帖睦爾  
達世光祿大夫中書平章政事知經筵事賀惟一  
翰林學士承旨榮祿大夫知制誥兼修國史張起

巖翰林學士資善大夫知制誥同修國史歐陽玄  
翰林侍講學士中奉大夫知制誥同修國史同知  
經筵事揭傒斯嘉議大夫治書侍御史李好文正  
議大夫崇文太監檢校書籍事楊宗瑞中大夫禮  
部尚書王沂

纂修官江西湖東道肅政廉訪使沙刺班江西湖東  
道肅政廉訪副使王理翰林待制奉議大夫兼國  
史院編修官伯顏奉訓大夫監察御史趙時敏奉  
訓大夫國子博士費著承務郎太常博士商企翁  
提調官榮祿大夫中書平章政事知經筵事伯顏榮

祿大夫中書右丞知經筵事達世帖睦爾資德大  
夫中書左丞董守簡中奉大夫叅議中書省事鎖  
南班嘉議大夫叅議中書省事蠻子亞中大夫叅  
議中書省事丁元奉議大夫右司郎中老老承德  
郎右司郎中陳思謙中順大夫左司郎中蠻子亞  
中大夫左司郎中何執禮奉訓大夫左司員外郎  
倉赤奉訓大夫左司都事趙公諒朝議大夫吏部  
尚書拜住通議大夫兵部尚書李獻正議大夫戶  
部尚書秦從龍正議大夫工部尚書路希賢朝散  
大夫禮部侍郎靳義亞中大夫刑部郎中顧恕通

議大夫僉太常禮儀院事杜秉彝文林郎翰林國  
史院都事趙中

修金史官員

金史卷一

元中書右丞相總裁脫脫等修

本紀第一

世紀

金之先出靺鞨氏靺鞨本號勿吉勿吉古肅慎地也元魏時勿吉有七部曰粟末部曰伯咄部曰安車骨部曰拂涅部曰號室部曰黑水部曰白山部隋稱靺鞨而七部並同唐初有黑水靺鞨粟末靺鞨其五部無聞粟末靺鞨始附高麗姓大氏李勣破高麗粟末靺鞨保東牟山後爲渤海稱王傳十餘世有文字禮樂官府制度有



五京十五府六十二州黑水靺鞨居肅慎地東瀕海南接高麗亦附于高麗嘗以兵十五萬衆助高麗拒唐太宗敗于安市開元中來朝置黑水府以部長爲都督刺史置長史監之賜都督姓李氏名獻誠領黑水經略使其後渤海盛強黑水役屬之朝貢遂絕五代時契丹盡取渤海地而黑水靺鞨附屬于契丹其在南者籍契丹號熟女直其在北者不在契丹籍號生女直生女直地有混同江長白山混同江亦號黑龍江所謂白山黑水是也金之始祖諱函普初從高麗來年已六十餘矣兄阿古迺好佛留高麗不肯從曰後世子孫必有能相聚

者吾不能去也獨與弟保活里俱始祖居完顏部僕幹  
水之涯保活里居耶懶其後胡十門以曷蘇館歸太祖  
自言其祖兄弟三人相別而去蓋自謂阿古迺之後石  
土門迪古乃保活里之裔也及太祖敗遼兵于境上獲  
耶律謝十乃使梁福幹荅刺招諭渤海人曰女直渤海  
本同一家蓋其初皆勿吉之七部也始祖至完顏部居  
久之其部人嘗殺它族之人由是兩族交惡鬪鬪不能  
解完顏部人謂始祖曰若能爲部人解此怨使兩族不  
相殺部有賢女年六十而未嫁當以相配仍爲同部始  
祖曰諾迺自往諭之曰殺一人而鬪不解損傷益多曷

若止誅首亂者一人部內以物納償汝可以無鬪而且  
獲利焉怨家從之乃爲約曰凡有殺傷人者徵其家人  
口一馬十偶牝牛十黃金六兩與所殺傷之家卽兩解  
不得私鬪曰謹如約女直之俗殺人償馬牛三十自此  
始旣備償如約部衆信服之謝以青牛一并許歸六十  
之婦始祖乃以青牛爲聘禮而納之并得其貲產後生  
二男長曰烏魯次曰斡魯一女曰注思板遂爲完顏部  
人天會十四年追諡景元皇帝廟號始祖皇統四年號  
其藏曰光陵五年增諡始祖懿憲景元皇帝子德帝諱  
烏魯天會十四年追諡德皇帝皇統四年號其藏曰熙

陵五年增諡淵穆立德皇帝子安帝諱跋海天會十四年追諡安皇帝皇統四年號其藏建陵五年增諡和靖慶安皇帝子獻祖諱綏可黑水舊俗無室廬負山水坎地梁水其上覆以土夏則出隨水草以居冬則入處其中遷徙不常獻祖乃徙居海古水耕墾樹藝始築室有棟宇之制人呼其地爲納葛里納葛里者漢語居室也自此遂定居于安出虎水之側矣天會十四年追諡定昭皇帝廟號獻祖皇統四年號其藏曰輝陵五年增諡獻祖純烈定昭皇帝子昭祖諱石魯剛毅質直生女直無書契無約束不可檢制昭祖欲稍立條教諸父部人

皆不悅欲坑殺之已被執叔父謝里忽知部衆將殺昭祖曰吾兄子賢人也必能承家安輯部衆此輩奈何輒欲坑殺之亟往彎弓注矢射于衆中劫執者皆散走昭祖乃得免昭祖稍以條教爲治部落寢強遠以惕隱官之諸部猶以舊俗不肯用條教昭祖耀武至于青嶺白山順者撫之不從者討伐之入于蘇濱耶懶之地所至克捷還經僕鶩水僕鶩漢語惡瘡也昭祖惡其地名雖已困憊不肯止行至姑里甸得疾迨夜寢于村舍有盜至遂中夜啓行至逼刺紀村止焉是夕卒載柩而行遇賊於路奪柩去部衆追賊與戰復得柩加古部人蒲虎

復來襲之垂及蒲虎問諸路人曰石魯柩去此幾何其  
人曰遠矣追之不及也蒲虎遂止於是乃得歸葬焉生  
女直之俗至昭祖時稍用條教民頗聽從尚未有文字  
無官府不知歲月晦朔是以年壽脩短莫得而考焉天  
會十五年追諡成襄皇帝廟號昭祖皇統四年藏號安  
陵五年增諡昭祖武惠成襄皇帝子景祖諱烏古迺遼  
太平元年辛酉歲生自始祖至此已六世矣景祖稍役  
屬諸部自白山耶悔統門耶懶土骨論之屬以至五國  
之長皆聽命是時遼之邊民有逃而歸者及遼以兵徙  
鐵勒烏惹之民鐵勒烏惹多不肯徙亦逃而來歸遼使

曷魯林牙將兵來索逋逃之民景祖恐遼兵深入盡得山川道路險易或將圖之乃以計止之曰兵若深入諸部必驚擾變生不測逋戶亦不可得非計也曷魯以爲然遂止其軍與曷魯自行索之是時鄰部雖稍從孩懶水烏林答部石顯尚拒阻不服攻之不克景祖以計告於遼主遼主遣使責讓石顯石顯乃遣其子婆諸刊入朝遼主厚賜遣還其後石顯與婆諸刊入見遼主於春蒐遼主乃留石顯於邊地而遣婆諸刊還所部景祖之謀也旣而五國蒲聶部節度使拔乙門叛遼鷹路不通遼人將討之先遣同幹來諭旨景祖曰可以計取若用

兵彼將走保險阻非歲月可平也遼人從之蓋景祖終畏遼兵之入其境也故自以爲功於是景祖陽與拔乙門爲好而以妻子爲質襲而擒之獻於遼主遼主召見於寢殿燕賜加等以爲生女直部族節度使遼人呼節度使爲太師金人稱都太師者自此始遼主將刻印與之景祖不肯繫遼籍辭曰請俟他日遼主終欲與之遣使來景祖詭使部人揚言曰主公若受印繫籍部人必殺之用是以拒之遼使乃還旣爲節度使有官屬紀綱漸立矣生女直舊無鐵鄰國有以甲冑來鬻者傾貲厚賈以與貿易亦令昆弟族人皆售之得鐵旣多因之以



修弓矢備器械兵勢稍振前後願附者衆幹泯水蒲察部泰神忒保水完顏部統門水溫迪痕部神隱水完顏部皆相繼來附景祖爲人寬恕能容物平生不見喜愠推財與人分食解衣無所吝惜人或忤之亦不念先時有叛去者遣人諭誘之叛者曰汝主活羅也活羅吾能獲之吾豈能爲活羅屈哉活羅漢語慈烏也北方有之狀如大雞善喙物見牛馬橐駝脊間有瘡啄其脊間食之馬牛輒死若飢不得食雖砂石亦食之景祖嗜酒好色飲啗過人時人呼曰活羅故彼以此訕之亦不以介意其後訕者力屈來降厚賜遣還曷懶水有率衆降者

錄其歲月姓名卽遣去俾復其故人以此益信服之遼  
咸雍八年五國沒撚部謝野勃堇叛遼鷹路不通景祖  
伐之謝野來禦景祖被重鎧率衆力戰謝野兵敗走拔  
里邁濼時方十月米忽解謝野不能軍衆皆潰去乃旋  
師道中遇逋亡要遮險阻晝夜拒戰比至部已憊卽往  
見遼邊將達魯骨自陳敗謝野功行次來流水未見達  
魯骨疾作而復卒於家年五十四天會十四年追諡惠  
桓皇帝廟號景祖皇統四年藏號定陵五年增諡景祖  
英烈惠桓皇帝第二子襲節度使是爲世祖諱劾里鉢  
生女直之俗生子年長卽異居景祖九子元配唐括氏

生劾者次世祖次劾孫次肅宗次穆宗及當異居景祖曰劾者柔和可治家務劾里鉢有器量智識何事不成劾孫亦柔善人耳乃命劾者與世祖同居劾孫與肅宗同居景祖卒世祖繼之世祖卒肅宗繼之肅宗卒穆宗繼之穆宗復傳世祖之子至於太祖竟登大位焉世祖遼重熙八年己卯歲生遼咸雍十年襲節度使景祖異母弟跋黑有異志世祖慮其爲變加意事之不使將兵但爲部長跋黑遂誘桓赫散達烏春窩謀罕爲亂及間諸部使貳于世祖世祖猶欲撫慰之語在跋黑桓赫等傳中世祖嘗買加古部鍛工烏不屯被甲九十烏春欲

託此以爲兵端世祖還其甲語在烏春傳部中有流言曰欲生則附於跋黑欲死則附于劾里鉢頗刺淑世祖聞之疑焉無以察之乃佯爲具裝欲有所往者陰遣人揚言曰寇至部衆聞者莫知虛實有保於跋黑之室者有保於世祖之室者世祖乃盡得兄弟部屬向背彼此之情矣間數年烏春來攻世祖拒之時十月已半大雨累晝夜冰澌覆地烏春不能進旣而悔曰此天也乃引兵去烏春舍於阿里矮村滓不乃家而以兵圍其弟勝昆於胡不村兵退勝昆執其兄滓不乃而請泣殺于世祖且請免其孥戮從之桓赫散達亦舉兵遣肅宗拒之

當是時烏春兵在北桓赫兵在南其勢甚盛戒之曰可  
和則與之和否則決戰肅宗兵敗會烏春以久雨解去  
世祖乃以偏師涉舍很水經貼割水覆桓赫散達之家  
明日大霧晦冥失道至婆多吐水乃覺卽還至舍很貼  
割之間升高阜望之見六騎來大呼馳擊之世祖射一  
人斃生獲五人問之乃知卜灰撒骨出使助桓赫散達  
者也世祖至桓赫散達所居焚蕩其室家殺百許人舊  
將主保亦死之比世祖還與肅宗會肅宗兵又敗矣世  
祖讓肅宗失利之狀遣人議和桓赫散達曰以爾盈歌  
之大赤馬辭不失之紫騮馬與我我則和二馬皆女直

名馬不許桓赫散達大會諸部來攻過裴滿部以其附於世祖也縱火焚之蒲察部沙祗勃堇胡補答勃堇使阿喜來告難世祖使之詭從以自全曰戰則以旗鼓自別世祖往禦桓赫之衆將行有報者曰跋黑食於愛妾之父家肉脹咽死矣乃遣肅宗求援於遼遂率衆出使辭不失取海姑兄弟兵已而乃知海姑兄弟貳於桓赫矣欲併取其衆徑至海姑偵者報曰敵已至將戰世祖戒辭不失曰汝先陣於脫豁改原待吾三揚旗三鳴鼓卽棄旗決戰死生唯在今日命不足惜使裴滿胡喜牽大紫騮馬以爲貳馬馳至陣時桓赫散達盛強世祖軍

吏未戰而懼皆植立無人色世祖陽陽如平常亦無責讓之言但令士卒解甲少憇以水沃面調麩水飲之有頃訓勵之軍勢復振乃避衆獨引穆宗執其手密與之言曰今日之事若勝則已萬一有不勝吾必無生汝今介馬遙觀勿預戰事若我死汝勿收吾骨勿顧戀親戚亟馳馬奔告汝兄頗刺淑于遼繫籍受印乞師以報此讐語畢袒袖不被甲以縕袍垂欄護前後心韋弓提劍三揚旗三鳴鼓棄旗搏戰身爲軍鋒突入敵陣衆從之辭不失從後奮擊大敗之乘勝逐之自阿不彎至于北隘甸死者如仆麻破多吐水水爲之赤棄車甲馬牛軍

實盡獲之世祖曰今日之捷非天不能及此亦可以知足矣雖縱之去敗軍之氣沒世不振乃引軍還世祖視其戰地馳突成大路濶且三十隴手殺九人自相重積人皆異之桓赧散達自此不能復聚未幾各以其屬來降遼大安七年也初桓赧兄弟之變不木魯部卜灰蒲察部撒骨出助之至是招之不肯和卜灰之黨石魯遂殺卜灰來降撒骨出追躡亡者道傍人潛射之中口而死自是舊部悉歸景祖時幹勒部人盃乃來屬及是有他志會其家失火因以縱火誣歡都世祖徵償如約盃乃不自安遂結烏春窩謀罕舉兵使肅宗與戰敗之獲



孟乃世祖獻之於遼臘醅麻產侵掠野居女直畧來流  
水牧馬世祖擊之中四創久之疾愈臘醅等復畧穆宗  
牧馬交結諸部世祖復伐之臘醅等給降乃旋臘醅得  
姑里甸兵百十有七人據暮稜水守險石顯子婆諸刊  
亦在其中世祖圍而克之盡獲姑里甸兵麻產遁去遂  
擒臘醅及婆諸刊皆獻之遼既已復請之遼人與之并  
以前後所獻罪人歸之歡都在破烏春等於斜堆故石  
拔石皆就擒世祖自將與歡都合兵嶺東諸軍皆至是  
時烏春已前死窩謀罕請于遼願和解既與和復來襲  
乃進軍圍之窩謀罕棄城遁去破其城盡俘獲之以功

差次分賜諸軍城始破議渠長生殺衆皆長跪遼使者在坐忽一人佩長刀突前咫尺謂世祖曰勿殺我遼使及左右皆走匿世祖色不少動執其人之手語之曰吾不殺汝也於是罰左右匿者曰汝等何敢失次耶罰旣已乃徐使執突前者殺之其膽勇鎮物如此師還寢疾遂篤元娶孛懶氏哭不止世祖曰汝勿哭汝惟後我一歲耳肅宗請後事曰汝惟後我三年肅宗出謂人曰吾兄至此亦不與我好言乃叩地而哭俄呼穆宗謂曰烏雅束柔善若辦集契丹事阿骨打能之遼大安八年五月十五日卒襲位十九年年五十四明年孛懶氏卒又

明年肅宗卒肅宗病篤歎曰我兄真多智哉世祖天性嚴重有智識一見必識暫聞不忘凝寒不縮栗動止不回顧每戰未嘗被甲先以夢兆候其勝負嘗乘醉騎驢入室中明日見驢足跡問而知之自是不復飲酒襲位之初內外潰叛締交爲寇世祖乃因敗爲功變弱爲彊旣破桓被散達烏春窩謀罕基業自此大矣天會十五年追諡聖肅皇帝廟號世祖皇統四年號其藏曰永陵五年增諡世祖神武聖肅皇帝母弟頗刺淑襲節度使景祖第四子也是爲肅宗遼重熙十一年壬午歲生在父兄時號國相國相之稱不知始何時初雅達爲國相

雅達者桓赦散達之父也景祖以幣馬求之於雅達而命肅宗爲之肅宗自幼機敏善辯當其兄時身居國相盡心匡輔是時叔父跋黑有異志及桓赦散達烏春窩謀罕石顯父子臘醅麻產作難用兵之際肅宗屢當一面尤能知遼人國政人情凡有遼事一切委之肅宗專心焉凡白事於遼官皆令遠跪陳辭譯者傳致之往往爲譯者錯亂肅宗欲得自前委曲言之故先不以實告譯者譯者惑之不得已引之前使自言乃以草木瓦石爲籌枚數其事而陳之官吏聽者皆愕然問其故則爲卑辭以對曰鄙陋無文故如此官吏以爲實然不復疑

之是以所訴無不如意桓被散達之戰部人賽罕死之  
其弟活羅陰懷忿怨一日忽以劍脊置肅宗項上曰吾  
兄爲汝輩死矣到汝以償則如之何久之因其兄柩至  
遂怒而攻習不出習不出走避之攻肅宗于家矢注次  
室之裙著于門扉復攻歡都歡都裹甲拒于室中旣不  
能入持其門旃而去往附盃乃盃乃誘烏春兵度嶺世  
祖與遇于蘇素海旬世祖曰予昔有異夢今不可親戰  
若左軍中有力戰者則大功成矣命肅宗及斜列辭不  
失與之戰肅宗下馬名呼世祖復自呼其名而言曰若  
天助我當爲衆部長則今日之事神祇監之語畢再拜

遂炷火束縕項之大風自後起火益熾是時八月并青  
草皆焚之煙焰漲天我軍隨煙衝擊大敗之遂獲盃乃  
囚而獻諸遼并獲活羅肅宗釋其罪左右任使之後竟  
得其力焉大安八年自國相襲位是時麻產尚據直屋  
鎧水繕完營堡誘納亡命招之不聽遣康宗伐之太祖  
別軍取麻產家屬錡釜無遺旣獲麻產殺之獻馘于遼  
陶溫水民來附二年癸酉遣太祖以偏師伐泥麗古部  
帥水抹離海村跋黑播立開平之自是寇賊皆息三年  
八月肅宗卒天會十五年追諡穆憲皇帝皇統四年藏  
號泰陵五年增諡肅宗明睿穆憲皇帝母弟穆宗諱盈

歌字烏魯完景祖第五子也南人稱揚割太師又曰揚割追諡孝平皇帝號穆宗又曰揚割號仁祖金代無號仁祖者穆宗諱盈歌諡孝平盈近揚歌近割南北音訛遼人呼節度使爲太師自景祖至太祖皆有是稱凡叢言松漠記張棣金志等書皆無足取穆宗遼重熙二十一年癸巳歲生肅宗時擒麻產遼命穆宗爲詳穩大安十年甲戌襲節度使年四十二以兄劾者子撤改爲國相三年丙子唐括部跋葛勃堇與溫都部人跋忒有舊跋葛以事往跋忒殺跋葛使太祖率師伐跋忒跋忒亡去追及殺之星顯水紇石烈部阿踈毛睹祿阻兵爲難

穆宗自將伐阿疎撒改以偏師攻鈍恩城拔之阿疎初聞來伐乃自訴于遼遂留劾者守阿疎城穆宗乃還會陶溫水徒籠古水紇石烈部阿閣版及石魯阻五國鷹路執殺遼捕鷹使者遼詔穆宗討之阿閣版等據險立柵方大寒乃募善射者操勁弓利矢攻之數日入其城出遼使存者數人俾之歸統門渾蠢水之交烏古論部留可詐都與蘇濱水烏古論敵庫德起兵于米里迷石罕城納根涅之子鈍恩亦亡去於是兩黨作難八月撒改爲都統辭不失阿里合懣幹帶副之以伐留可詐都塢塔等謾都訶石土門伐敵庫德撒改欲先平邊地城



堡或欲先取留可莫能決乃命太祖往鈍恩將援留可乘謾都訶兵未集而攻之石土門軍旣與謾都訶會迎擊鈍恩大敗之降米里迷石罕城獲鈍恩敵庫德釋弗殺太祖度盆搨嶺與撒改會攻破留可城留可已先往遼矣盡殺其城中渠長還圍塢塔城塢塔先已亡在外城降於軍詐都亦降於蒲家奴於是撫寧諸路如舊時太祖因致穆宗教統門渾蠢耶海星顯四路及嶺東諸部自今勿復稱都部長命勝管醜阿等撫定乙離骨嶺注阿門水之西諸部居民又命幹帶及偏裨悉平二涅囊虎二蠢出等路寇盜而還七年庚辰劾者尚守阿疎

城毛睹祿來降阿疎猶在遼遼使使來罷兵未到穆宗使烏林荅石魯往佐劾者戒之曰遼使來罷兵但換我軍衣服旗幟與阿疎城中無辨勿令遼使知之因戒劾者曰遼使可以計却勿聽其言遽罷兵也遼使果來罷兵穆宗使蒲察部胡魯勃堇邈遜孛堇與俱至阿疎城劾者見遼使詭謂胡魯邈遜曰我部族自相攻擊于汝等何事誰識汝之太師乃援劍刺殺胡魯邈遜所乘馬遼使驚駭遽走不敢回顧徑歸居數日破其城狄故保還自遼在城中執而殺之阿疎復訴於遼遼遣奚節度使乙烈來穆宗至來流水興和村見乙烈問阿疎城事

命穆宗曰凡攻城所獲存者復與之不存者備償且徵馬數百匹穆宗與僚佐謀曰若償阿疎則諸部不復可號令任使也乃令主隈秃荅兩水之民陽爲阻絕鷹路復使鼈故德部節度使言于遼曰欲開鷹路非生女直節度使不可遼不知其爲穆宗謀也信之命穆宗討阻絕鷹路者而阿疎城事遂止穆宗聲言平鷹路敗於土溫水而歸是歲留可來降八年辛巳遼使使特賜物來賞平鷹路之有功者九年壬午使蒲家奴以遼賜給主隈秃荅之民且修鷹路而歸冬蕭海里叛入于係案女直阿典部遣其族人幹達刺來結和曰願與太師爲友

同往伐遼穆宗執斡達刺會遼命穆宗捕討海里穆宗  
送斡達刺于遼募軍得甲千餘女直甲兵之數始見于  
此蓋未嘗滿千也軍次混同水蕭海里再使人來復執  
之旣而與海里遇海里遙問曰我使者安在對曰與後  
人偕來海里不信是時遼追海里兵數千人攻之不能  
克穆宗謂遼將曰退爾軍我當獨取海里遼將許之太  
祖策馬突戰流矢中海里首海里墮馬下執而殺之大  
破其軍使阿离合懣獻馘于遼金人自此知遼兵之易  
與也是役也康宗最先登於是以先登并有功者爲前  
行次以諸軍護俘獲歸所部穆宗朝遼主于漁所大被

嘉賞授以使相錫予加等十年癸未二月穆宗還遼使使授從破海里者官賞高麗始來通好十月二十九日穆宗卒年五十有一初諸部各有信牌穆宗用太祖議擅置牌號者寘于法自是號令乃一民聽不疑矣自景祖以來兩世四主志業相因卒定離析一切治以本部法令東南至于乙離骨曷懶耶懶土骨論東北至于五國主隈秃荅金蓋盛于此天會十五年追諡孝平皇帝廟號穆宗皇統四年號其藏曰獻陵五年增諡章順孝平皇帝兄子康宗諱烏雅束字毛路完世祖長子也遼清寧七年辛丑歲生乾統五年癸未襲節度使年四十

三穆宗末年阿疎使達紀誘扇邊民曷懶甸人執送之  
穆宗使石適歡撫納曷懶甸未行穆宗卒至是遣焉先  
是高麗通好旣而頗有隙高麗使來請議事使者至高  
麗拒而不納五水之民附于高麗執團練使十四人語  
在高麗傳中二年甲申高麗再來伐石適歡再破之高  
麗復請和前所執團練十四人皆遣歸石適歡撫定邊  
民而還蘇濱水民不聽命使幹帶等至活羅海川召諸  
官僚告諭之含國部蘇濱水居幹豁勃堇不至幹准部  
職德部旣至復亡去塢塔遇二部於馬紀嶺執之而來  
遂伐幹豁克之幹帶進至北琴海攻拔泓忒城乃還四

年丙戌高麗遣黑歡方石來賀襲位遣孟魯報之高麗約還諸亡在彼者乃使阿聒勝昆往受之高麗背約殺二使築九城於曷懶甸以兵數萬來攻幹賽敗之幹魯亦築九城與高麗九城相對高麗復來攻幹賽復敗之高麗約以還逋逃之人退九城之軍復所侵故地九月乃罷兵七年己丑歲不登減盜賊徵償振貧乏者十一年癸酉康宗卒年五十三天會十五年追諡恭簡皇帝皇統四年號其藏曰喬陵五年增諡康宗獻敏恭簡皇帝

贊曰金之厥初兄弟三人亦微矣熙宗追帝祖宗定著

始祖景祖世祖廟世世不祧始祖娶六十之婦而生二男一女豈非天耶景祖不受遼籍遼印取雅達國相以與其子世祖旣破桓赫散達遼政日衰而以太祖屬之穆宗其思慮豈不深遠矣夫



金史卷一

金史卷一考證

世紀女直○

臣宗楷

按金志本名朱里真音轉爲女真

或曰慮真避契丹興宗名又曰女直

金之始祖諱函普德帝諱烏魯安帝諱跋海獻祖諱綏  
可昭祖諱石魯景祖諱烏古迺世祖諱劾里鉢世祖  
母弟頗刺淑肅宗母弟盈歌穆宗兄烏雅束○

臣浩

按松漠紀聞金九代祖名龕福號始祖八代祖名訛  
魯七代祖名佯海六代祖名隨濶五代祖孛堇名實  
魯高祖太師名胡來曾祖名核里會叔祖太師名蒲  
刺麥曾季祖太師名楊哥伯祖太師名吳刺束俱追

加諡號

金史卷一考證

金史卷二

元中書右丞相總裁脫脫等修

本紀第二

太祖

太祖應乾興運昭德定功仁明莊孝大聖武元皇帝諱  
旻本諱阿骨打世祖第二子也母曰翼簡皇后孛懶氏  
遼道宗時有五色雲氣屢出東方大若二千斛困倉之  
狀司天孔致和竊謂人曰其下當生異人建非常之事  
天以象告非人力所能爲也咸雍四年戊申七月一日  
太祖生幼時與羣兒戲力兼數輩舉止端重世祖尤愛

之世祖與臘醅麻產戰於野鵲水世祖被四創疾困坐  
太祖于膝循其髮而撫之曰此兒長大吾復何憂十歲  
好弓矢甫成童卽善射一日遼使坐府中顧見太祖手  
持弓矢使射羣鳥連三發皆中遼使矍然曰奇男子也  
太祖嘗宴紇石烈部活离罕家散步門外南望高阜使  
衆射之皆不能至太祖一發過之度所至踰三百二十  
步宗室謾都訶最善射遠其不及者猶百步也天德三  
年立射碑以識焉世祖伐卜灰太祖因辭不失請從行  
世祖不許而心異之烏春旣死窩謀罕請和旣請和復  
來攻遂圍其城太祖年二十三被短甲免胄不介馬行

圍號令諸軍城中望而識之壯士太峪乘駿馬持槍出城馳刺太祖太祖不及備舅氏活臘胡馳出其間擊太峪槍折刺中其馬太峪僅得免嘗與沙忽帶出營殺略不令世祖知之且還敵以重兵追之獨行隘巷中失道追者益急值高岸與人等馬一躍而過追者乃還世祖寢疾太祖以事如遼統軍司將行世祖戒之曰汝速了此事五月未半而歸則我猶及見汝也太祖往見曷魯騷古統軍既畢事前世祖没一日還至家世祖見太祖來所請事皆如志喜甚執太祖手抱其頸而撫之謂穆宗曰烏雅束柔善惟此子足了契丹事穆宗亦雅重太

祖出入必俱太祖遠出而歸穆宗必親迓之世祖已擒臘醅麻產尚據直屋鎧水肅宗使太祖先取麻產家屬康宗至直屋鎧水圍之太祖會軍親獲麻產獻馘於遼遼命太祖爲詳穩仍命穆宗辭不失歡都皆爲詳穩久之以偏師伐泥厖古部跋黑播立開等乃以達塗阿爲鄉導沿帥水夜行襲之虜其妻子初溫都部跋忒殺唐括部跋葛穆宗命太祖伐之太祖入辭謂穆宗曰昨夕見赤祥此行必克敵遂行是歲大雪寒甚與烏古論部兵沿土溫水過末鄰鄉追及跋忒於阿斯溫山北灤之間殺之軍還穆宗親迓太祖於靄建村撤改以都統伐

留可謾都訶合石土門伐敵庫德撒改與將佐議或欲先平邊地部落城堡或欲徑攻留可城議不能決願得太祖至軍中穆宗使太祖往曰事必有可疑軍之未發者止有甲士七十盡以畀汝謾都訶在米里迷石罕城下石土門未到土人欲執謾都訶以與敵使來告急遇太祖於斜堆甸太祖曰國兵盡在此矣使敵先得志於謾都訶後雖種誅之何益也乃分甲士四十與之太祖以三十人詣撒改軍道遇人曰敵已據盆搦嶺南路矣衆欲由沙偏嶺往太祖曰汝等畏敵耶旣度盆搦嶺不見敵已而聞敵乃守沙偏嶺以拒我及至撒改軍夜急



攻之遲明破其衆是時留可塢塔皆在遼旣破留可還  
攻塢塔城城中人以城降初太祖過盆嶺嶺經塢塔城  
下從騎有後者塢塔城人攻而奪之釜太祖駐馬呼謂  
之曰毋取我炊食器其人謾言曰公能來此何憂不得  
食太祖以鞭指之曰吾破留可卽於汝乎取之至是其  
人持釜而前曰奴輩誰敢毀祥穩之器也遣蒲家奴招  
詐都詐都乃降釋之穆宗將伐蕭海里募兵得千餘人  
女直兵未嘗滿千至是太祖勇氣自倍曰有此甲兵何  
事不可圖也海里來戰與遼兵合因止遼人自爲戰勃  
海留守以甲贈太祖太祖亦不受穆宗問何爲不受曰

被彼甲而戰戰勝則是因彼成功也穆宗末年令諸部不得擅置信牌馳驛訊事號令自此始一皆自太祖啓之康宗七年歲不登民多流莩彊者轉而爲盜歡都等欲重其法爲盜者皆殺之太祖曰以財殺人不可財者人所致也遂減盜賊徵償法爲徵三倍民間多逋負賣妻子不能償康宗與官屬會議太祖在外庭以帛繫杖端麾其衆令曰今貧者不能自活賣妻子以償債骨肉之愛人心所同自今三年勿徵過三年徐圖之衆皆聽令聞者感泣自是遠近歸心焉歲癸巳十月康宗夢逐狼屢發不能中太祖前射中之且日以所夢問僚佐衆

曰吉兄不能得而弟得之之兆也是歲康宗卽世太祖襲位爲都勃極烈遼使阿息保來曰何以不告喪太祖曰有喪不能弔而乃以爲罪乎他日阿息保復來徑騎至康宗殯所閱贈馬欲取之太祖怒將殺之宗雄諫而止旣而遼命久不至遼主好畋獵淫酗怠于政事四方奏事往往不見省紇石烈阿疎旣奔遼穆宗取其城及其部衆不能歸遂與族弟銀朮可辭里罕陰結南江居人渾都僕速欲與俱亡入高麗事覺太祖使夾古撒喝捕之而銀朮可辭里罕先爲遼戍所獲渾都僕速已亡去撒喝取其妻子而還二年甲午六月太祖至江西遼

使使來致襲節度之命初遼每歲遣使市名鷹海東青于海上道出境內使者貪縱徵索無藝公私厭苦之康宗嘗以不遣阿疎爲言稍拒其使者太祖嗣節度亦遣蒲家奴往索阿疎故常以此二者爲言終至于滅遼然後已至是復遣宗室習古迺完顏銀朮可往索阿疎習古迺等還具言遼主驕肆廢弛之狀於是召官僚耆舊以伐遼告之使備衝要建城堡修戎器以聽後命遼統軍司聞之使節度使捏哥來問狀曰汝等有異志乎修戰具飭守備將以誰禦太祖荅之曰設險自守又何問哉遼復遣阿息保來詰之太祖謂之曰我小國也事大

國不敢廢禮大國德澤不施而逋逃是主以此字小能無望乎若以阿疎與我請事朝貢苟不獲已豈能束手受制也阿息保還遼人始爲備命統軍蕭撻不野調諸軍於寧江州太祖聞之使僕聒刺復索阿疎實觀其形勢僕聒刺還言遼兵多不知其數太祖曰彼初調兵豈能遽集如此復遣胡沙保往還言惟四院統軍司與寧江州軍及渤海八百人耳太祖曰果如吾言謂諸將佐曰遼人知我將舉兵集諸路軍備我我必先發制之無爲人制衆皆曰善乃入見宣靖皇后告以伐遼事后曰汝嗣父兄立邦家見可則行吾老矣無貽我憂汝必不

至是也太祖感泣奉觴爲壽卽奉后率諸將出門舉觴  
東向以遼人荒肆不歸阿疎并已用兵之意禱於皇天  
后土酌畢后命太祖正坐與僚屬會酒號令諸部使婆  
盧火徵移懶路迪古乃兵幹魯古阿魯撫諭幹忽急賽  
兩路係遼籍女直實不迭往完睹路執遼障鷹官達魯  
古部副使辭列寧江州渤海大家奴於是達魯古部實  
里館來告曰聞舉兵伐遼我部誰從太祖曰吾兵雖少  
舊國也與汝隣境固當從我若畏遼人自往就之九月  
太祖進軍寧江州次寥晦城婆盧火徵兵後期杖之復  
遣督軍諸路兵皆會于來流水得二千五百人致遼之

罪申告于天地曰世事遼國恪修職貢定烏春窩謀罕之亂破蕭海里之衆有功不省而侵侮是加罪人阿疎屢請不遣今將問罪於遼天地其鑒佑之遂命諸將傳挺而誓曰汝等同心盡力有功者奴婢部曲爲良庶人官之先有官者敘進輕重眦功苟違誓言身死挺下家屬無赦師次唐括帶幹甲之地諸軍禳射介而立有光如烈火起於人足及戈矛之上人以爲兵祥明日次扎只水光見如初將至遼界先使宗幹督士卒夷塹旣度遇渤海軍攻我左翼七謀克衆少却敵兵直犯中軍斜也出戰哲垓先驅太祖曰戰不可易也遣宗幹止之宗

幹馳出斜也前控止哲垤馬斜也遂與俱還敵人從之  
耶律謝十墜馬遼人前救太祖射救者斃併射謝十中  
之有騎突前又射之徹扎洞胷謝十拔箭走追射之中  
其背飲矢之半償而死獲所乘馬宗幹與數騎陷遼軍  
中太祖救之免胄戰或自傍射之矢拂于額太祖顧見  
射者一矢而斃謂將士曰盡敵而止衆從之勇氣自倍  
敵大奔相蹂踐死者十七八撒改在別路不及會戰使  
人以戰勝告之而以謝十馬賜之撒改使其子宗翰完  
顏希尹來賀且稱帝因勸進太祖曰一戰而勝遂稱大  
號何示人淺也進軍寧江州諸軍填塹攻城寧江人自



東門出溫迪痕阿徒罕邀擊盡殪之十月朔克其城獲防禦使大藥師奴陰縱之使招諭遼人鐵驪部來送款次來流域以俘獲賜將士召渤海梁福幹荅刺使之僞亡去招諭其鄉人曰女直渤海本同一家我興師伐罪不濫及無辜也使完顏婁室招諭係遼籍女直師還謁宣靖皇后以所獲頒宗室耆老以實里館貲產給將士初命諸路以三百戶爲謀克十謀克爲猛安酬幹等撫定讒謀水女直鼈古曾長胡蘇魯以城降十一月遼都統蕭乂里副都統撻不野將步騎十萬會于鴨子河北太祖自將擊之未至鴨子河旣夜太祖方就枕若有扶

其首者三寤而起曰神明警我也卽鳴鼓舉燧而行黎  
明及河遼兵方壞陵道選壯士十輩擊走之大軍繼進  
遂登岸甲士三千七百至者纔三之一俄與敵遇于出  
河店會大風起塵埃蔽天乘風勢擊之遼兵潰逐至幹  
論灤殺獲首虜及車馬甲兵珍玩不可勝計徧賜官屬  
將士燕犒彌日遼人嘗言女直兵若滿萬則不可敵至  
是始滿萬云幹魯敗遼兵斬其節度使撻不野僕虺等  
攻賓州拔之兀惹雞鶻室來降遼將赤狗兒戰于賓州  
僕虺渾黜敗之鐵驪王回离保以所部降吾睹補蒲察  
復敗赤狗兒蕭乙薛軍于祥州東幹忽急塞兩路降幹

魯古敗遼軍于咸州西斬統軍婁實于陣完顏婁室克咸州是月吳乞買撒改辭不失率官屬諸將勸進願以新歲元日恭上尊號太祖不許阿离合懣蒲家奴宗翰等進曰今大功已建若不稱號無以繫天下心太祖曰吾將思之

收國元年正月壬申朔羣臣奉上尊號是日卽皇帝位上曰遼以賓鐵爲號取其堅也賓鐵雖堅終亦變壞惟金不變不壞金之色白完顏部色尚白於是國號大金改元收國丙子上自將攻黃龍府進臨益州州人走保黃龍取其餘民以歸遼遣都統耶律訛里朶左副統蕭

乙薛右副統耶律張奴都監蕭謝佛留騎二十萬步卒  
七萬戍邊留婁室銀朮可守黃龍上率兵趨達魯古城  
次寧江州西遼使僧家奴來議和國書斥上名且使爲  
屬國庚子進師有火光正圓自空而墜上曰此祥徵殆  
天助也酌白水而拜將士莫不喜躍進逼達魯古城上  
登高望遼兵若連雲灌木狀顧謂左右曰遼兵心貳而  
情怯雖多不足畏遂趨高阜爲陣宗雄以右翼先馳遼  
左軍左軍却左翼出其陣後遼右軍皆力戰婁室銀朮  
可衝其中堅凡九陷陣皆力戰而出宗翰請以中軍助  
之上使宗幹往爲疑兵宗雄已得利擊遼右軍遼兵遂

敗乘勝追躡至其營會日已暮圍之黎明遼軍潰圍出  
逐北至阿婁岡遼步卒盡殪得其耕具數千以給諸軍  
是役也遼人本欲屯田且戰且守故併其耕具獲之二  
月師還三月辛未朔獵于寥晦城四月遼耶律張奴以  
國書來上以書辭慢侮留其五人獨遣張奴回報書亦  
如之五月庚午朔避暑于近郊甲戌拜天射柳故事五  
月五日七月十五日九月九日拜天射柳歲以爲常六  
月己亥朔遼耶律張奴復以國書來猶斥上名上亦斥  
遼主名以復之且諭之使降七月戊辰以弟吳乞買爲  
諳班勃極烈國相撤改爲國論勃極烈辭不失爲阿買

勃極烈弟斜也爲國論勃極烈甲戌遼使辭刺以書來  
留之不遣九百奚營來降八月戊戌上親征黃龍府次  
混同江無舟上使一人道前乘赭白馬徑涉曰視吾鞭  
所指而行諸軍隨之水及馬腹後使舟人測其渡處深  
不得其底熙宗天眷二年以黃龍府爲濟州軍曰利涉  
蓋以太祖涉濟故也九月克黃龍府遣辭刺還遂班師  
至江徑渡如前丁丑至自黃龍府己卯黃龍見空中癸  
巳以國論勃極烈撒改爲國論忽魯勃極烈阿离合懣  
爲國論乙室勃極烈十一月遼主聞取黃龍府大懼自  
將七十萬至駝門駙馬蕭特末林牙蕭查刺等將騎五

萬步四十萬至幹鄰灤上自將禦之十二月己亥行次  
爻刺會諸將議皆曰遼兵號七十萬其鋒未易當吾軍  
遠來人馬疲乏宜駐于此深溝高壘以待上從之遣迪  
古乃銀朮可鎮達魯古丁未上以騎兵親候遼軍獲督  
餉者知遼主以張奴叛西還二日矣是日上還至熟結  
灤有光見于矛端戊申諸將曰今遼主旣還可乘怠追  
擊之上曰敵來不迎戰去而追之欲以此爲勇邪衆皆  
悚愧願自効上復曰誠欲追敵約齋以往無事餽饋若  
破敵何求不得衆皆奮躍追及遼主于護步荅岡是役  
也兵止二萬上曰彼衆我寡兵不可分視其中軍最堅

遼主必在焉敗其中軍可以得志使右翼先戰兵數交左翼合而攻之遼兵大潰我師馳之橫出其中遼師敗績死者相屬百餘里獲輿輦帟幄兵械軍資他寶物馬牛不可勝計是戰斜也援矛殺數十人阿离本被圍溫迪罕迪忽迭以四謀克兵出之完顏蒙刮身被數創力戰不已功皆論最蕭特末等焚營遁去遂班師夾谷撒喝取開州婆盧火下特鄰城辭里罕降

二年正月戊子詔曰自破遼兵四方來降者衆宜加優恤自今契丹奚漢渤海係遼籍女直韋室達魯古元惹鐵驪諸部官民已降或爲軍所俘獲逃遜而還者勿以



爲罪其酋長仍官之且使從宜居處閏月高永昌據東京使撻不野來求援高麗遣使來賀撻且求保州詔許自取之二月己巳詔曰比以歲凶庶民艱食多依附豪族因爲奴隸及有犯法徵償莫辦折身爲奴者或私約立限以人對贖過期則爲奴者並聽以兩人贖一爲良若元約以一人贖者卽從元約四月乙丑以斡魯統內外諸軍與蒲察迪古乃會咸州路都統斡魯古討高永昌胡沙補等被害五月斡魯等敗永昌撻不野擒永昌以獻戮之于軍東京州縣及南路係遼女直皆降詔除遼法省稅賦置猛安謀克一如本朝之制以斡魯爲南

路都統迭勃極烈阿徒罕破遼兵六萬于照散城九月  
己亥上獵近郊乙巳南路都統幹魯來見于婆盧買水  
始製金牌十二月庚申朔詣班勃極烈吳乞買及羣臣  
上尊號曰大聖皇帝改明年爲天輔元年天輔元年正  
月開州叛加古撒喝等討平之國論吳勃極烈斜也以  
兵一萬取秦州四月遼秦晉國王耶律捏里來伐迪古  
乃婁室婆盧火將兵二萬會咸州路都統幹魯古擊之  
五月丁巳詔自收寧江州已後同姓爲婚者杖而離之  
七月戊申以完顏幹論知東京事八月癸亥高麗遣使  
來請保州十二月甲子幹魯古等敗耶律捏里兵于蒺

金史卷二  
本紀  
三  
蔡山拔顯州乾懿豪徽成川惠等州皆降是月宋使登  
州防禦使馬政以國書來其略曰日出之分實生聖人  
竊聞征遼屢破勅敵若克遼之後五代時陷入契丹漢  
地願畀下邑

二年正月庚寅遼雙州節度使張崇降使散覲如宋報  
聘書曰所請之地今當與宋夾攻得者有之二月癸丑  
朔遼使耶律奴哥等來議和辛酉孛堇迪古乃婁室來  
見上以遼主近在中京而敢輒來皆杖之劾里保雙古  
等言咸州都統幹魯古知遼主在中京而不進討芻糧  
豐足而不以實聞攻顯州時所獲生口財畜多自取三

月癸未朔命聞哥代爲都統而鞠治之幹魯古坐降謀克壬辰遼使耶律奴哥以國書來庚子以婁室言黃龍府地僻且遠宜重戍守乃命合諸路謀克以婁室爲萬戶鎮之四月辛巳遼使以國書來五月丙申命胡突袞如遼六月甲寅詔有司禁民凌虐典雇良人及倍取贖直者甲戌遼通祺雙遼等州八百餘戶來歸命分置諸部擇膏腴之地處之七月癸未詔曰匹里水路完顏木里古渤海大家奴等六謀克貧乏之民昔嘗給以官糧置之漁獵之地今歷日已久不知登耗可具其數以聞胡突袞還自遼耶律奴哥復以國書來丙申胡突袞如

遼遼戶二百來歸處之泰州詔遣阿里骨李家奴特里  
底招諭未降者仍詔達魯古部勃堇辭列凡降附新民  
善爲存撫來者各令從便安居給以官糧毋輒動擾八  
月胡突袞還自遼耶律奴哥突迭復以國書來九月戊  
子詔曰國書詔令宜選善屬文者爲之其令所在訪求  
博學雄才之士敦遣赴闕閏月庚戌朔以降將霍石韓  
慶和爲千戶九百奚部蕭寶乙辛北部訛里野漢人王  
六兒王伯龍契丹特末高從祐等各率衆來降遼耶律  
奴哥以國書來十月癸未以龍化州降者張應古劉仲  
良爲千戶乙未咸州都統司言漢人李孝功渤海二哥

率衆來降命各以所部爲千戶十二月甲辰遣李堇朮  
孛以定遼地諭高麗耶律奴哥以國書來遼懿州節度  
使劉宏以戶三千并執遼候人來降以爲千戶川州寇  
二萬已降復叛紇石烈照里擊破之

三年正月甲寅東京人爲質者永吉等五人結衆叛事  
覺誅其首惡餘皆杖百没入在行家屬資產之半詔知  
東京事幹論繼有犯者並如之丙辰詔鼈古孛堇酬幹  
曰胡魯古迭八合二部來送款若等先時不無交惡自  
今毋相侵擾三月耶律奴哥以國書來四月丙子朔日  
有食之五月壬戌詔咸州路都統司曰兵興以前曷蘇

館回怕里與係遼籍不係遼籍女直戶民有犯罪流竄邊境或亡入于遼者本皆吾民遠在異境朕甚憫之今既議和當行理索可明諭諸路千戶謀克徧與詢訪其官稱名氏地里具錄以上六月辛卯遼遣太傅習泥烈等奉冊璽來上擿冊文不合者數事復之散覲還自宋使馬政及其子宏來聘散覲受宋團練使上怒杖而奪之宋使還復遣孛堇辭列曷魯等如宋七月辛亥遼人楊詢卿羅子韋各率衆來降命各以所部爲謀克八月己丑頒女直字九月以遼冊禮使失期詔諸路軍過江屯駐十一月習泥烈等復以國書來曷懶甸長城高

麗增築三尺詔胡刺古習顯慎固營壘

四年二月辭列曷魯還自宋宋使趙良嗣王暉來議燕  
京西京地三月甲辰上謂羣臣曰遼人屢敗遣使求成  
惟飾虛辭以爲緩師之計當議進討其令咸州路統軍  
司治軍旅修器械具數以聞辛酉詔咸州路都統司曰  
朕以遼國和議無成將以四月二十五日進師令斜葛  
留兵一千鎮守闡母以餘兵來會于渾河遼習泥烈以  
國書來四月乙未上自將伐遼以遼使習泥烈宋使趙  
良嗣等從行五月甲辰次渾河西使宗雄先趨上京遣  
降者馬乙持詔諭城中壬子至上京詔官民曰遼主失



道上下同怨朕興兵以來所過城邑負固不服者卽攻拔之降者撫恤之汝等必聞之矣今爾國和好之事反覆見欺朕不欲天下生靈久罹塗炭遂決策進討比遣宗雄等相繼招諭尚不聽從今若攻之則城破矣重以弔伐之義不欲殘民故開示明詔諭以禍福其審圖之上京人恃禦備儲蓄爲固守計甲寅亟命進攻上謂習泥烈趙良嗣等曰汝可觀我用兵以下去就上親臨城督將士諸軍鼓譟而進自旦及巳闔母以麾下先登克其外城留守撻不野以城降趙良嗣等奉觴爲壽皆稱萬歲是日赦上京官民詔諭遼副統余覲壬戌次沃黑

河宗幹率羣臣諫曰地遠時暑軍馬罷乏若深入敵境糧餽乏絕恐有後艱上從之乃班師命分兵攻慶州余覩襲闇母於遼河完顏背荅塢塔等戰却之完顏特虎死焉七月癸卯上至自伐遼九月燭隈木部實里古達等殺孛堇酬幹僕忽得以叛十月戊辰朔日有食之戊寅命幹魯分胡刺古烏春之兵以討實里古達十一月東京留守司乞本京官民質子增數番代上不許曰諸質子已各受田廬若復番代則往來動搖可並仍舊十二月宋復使馬政來請西京之地

五年春正月幹魯敗實里古達於合撻刺山誅首惡四

人餘悉撫定二月遣昱及宗雄分諸路猛安謀克之民萬戶屯秦州以婆盧火統之賜耕牛五十四月乙丑朔宗翰請伐遼詔諸路預戒軍事五月遼都統耶律余覲等詣咸州降閏月辛巳國論胡魯勃極烈撒改薨六月癸巳余覲與其將吏來見丙申千戶胡离荅坐擅署部人爲蒲里衍杖一百罷之庚子詔諸班勃極烈吳乞買貳國政以吳勃極烈斜也爲忽魯勃極烈蒲家奴爲吳勃極烈宗翰爲移賚勃極烈七月庚辰詔咸州都統司曰自余覲來灼見遼國事宜已決議親征其治軍以俟師期尋以連雨罷親征命吳勃極烈昱爲都統移賚勃

極烈宗翰副之帥師而西十一月辛丑以忽魯勃極烈  
杲爲內外諸軍都統以昱宗翰宗幹宗望宗盤等副之  
甲辰詔曰遠政不綱人神共棄今欲中外一統故命汝  
率大軍以行討伐爾其慎重兵事擇用善謀賞罰必行  
糧餉必繼勿擾降服勿縱俘掠見可而進無淹師期事  
有從權毋須申稟戊申詔曰若克中京所得禮樂儀仗  
圖書文籍並先次津發赴闕

六年正月癸酉都統杲克高恩回紇三城乙亥取中京  
遂下澤州二月庚寅朔日有食之己亥宗翰等敗遼奚  
王霞末于北安州降奚都西節度使訛里刺以本部降

壬寅都統杲遣使來奏捷并獻所獲貨寶詔曰汝等提兵于外克副所任攻下城邑撫安人民朕甚嘉之所言分遣將士招降山前諸部計悉已撫定續遣來報山後若未可往卽營田牧馬俟及秋成乃圖大舉更當熟議見可則行如欲益兵具數來上不可恃一戰之勝輒有弛慢新降附者當善撫存宣諭將士使知朕意宗翰駐北安遣希尹等略地獲遼護衛耶律習泥烈知遼主獵鴛鴦灤以其子晉王賢而有人望惡而殺之衆益離心雖有西北西南兩路兵馬皆羸弱遂遣耨盪溫都等報都統杲進兵襲之二月都統杲出青嶺宗翰出瓢嶺追

遼主于鴛鴦灤遼主奔西京宗翰復追至白水灤不及  
獲其貨寶己巳至西京壬申西京降希尹追遼主于乙  
室部不及乙亥西京復叛是月遼秦晉國王耶律捏里  
卽位于燕四月辛卯復取西京壬辰遣徒單吳甲高慶  
裔于宋戊戌都統杲自西京趨白水灤吳勃極烈昱襲  
毗室部于鐵呂川爲敵所敗還會察刺兵追至黃水北  
大破之耶律坦招徠西南諸部西至夏其招討使耶律  
佛頂降金肅西平二郡漢軍四千餘人叛去耶律坦等  
襲取之闍母婁室招降天德雲內寧邊東勝等州獲阿  
疎而還是時山西城邑諸部雖降人心未固遼主保陰

山耶律捏里在燕京都統杲遣宗望入奏請上臨軍五月辛酉宗望來奏捷百官入賀賜宴歡甚先是獲遼樞密使得里底節度使和尚雅里斯余里野等都統杲使阿鄰護送赴闕得里底道亡阿鄰坐誅耶律捏里遣使請罷兵戊寅使楊勉以書諭捏里使之降謀葛失遣其子菹泥刮失貢方物六月戊子朔上親征遼發自上京諳班勃極烈吳乞買監國辛亥詔諭上京官民曰朕順天弔伐已定三京但以遼主未獲兵不能已今者親征欲由上京路進恐撫定新民驚疑失業已出自篤密呂其先降後叛逃入險阻者詔後出首悉免其罪若猶拒

命孛戮無赦是月耶律捏里卒幹魯婁室敗夏人於野  
谷七月甲子詔諸將無得遠迎以廢軍務乙丑上京漢  
人毛八十率二千餘戶降因命領之丙寅以幹荅刺招  
降者衆命領八千戶以忽薛副之壬午希尹以阿疎見  
杖而釋之八月己丑次鴛鴦灤都統杲率官屬來見癸  
巳上追遼主于大魚灤昱宗望追及遼主于石輦鐸與  
戰敗之遼主遁己亥次居延北辛丑中京將完顏渾黜  
敗契丹奚漢六萬于高州孛堇麻吉死之得里得滿部  
降昱宗望追遼主于烏里質鐸不及九月庚申次草灤  
闡母平中京部族之先叛者及招撫沿海郡縣節度使



耶律慎思領諸部入內地乙丑詔六部奚曰汝等既降復叛扇誘衆心罪在不赦尚以歸附日淺恐綏懷之道有所未孚故復令招諭若能速降當釋其罪官皆仍舊歸化州降戊辰次歸化州甲戌宗雄薨丁丑奉聖州降十月丙戌朔次奉聖州詔曰朕屢勅將臣安輯懷附無或侵擾然愚民無知尚多逃匿山林卽欲加兵深所不忍今其逃散人民罪無輕重咸與矜免有能率衆歸附者授之世官或奴婢先其主降並釋爲良其布告之使諭朕意蔚州降庚寅余覩等遣蔚州降臣翟昭彥徐興田慶來見命昭彥慶皆爲刺史興爲團練使詔曰比以

幽薊一方招之不服今欲帥師以往故先安撫山西諸部汝等既已懷服宜加撫存官民未附已前罪無輕重及係官逋負皆與釋免諸官各遷敘之丁酉蔚州翟昭彥田慶殺知州事蕭觀寧等以叛丙午復降十一月詔諭燕京官民王師所至降者赦其罪官皆仍舊十二月上伐燕京宗望率兵七千先之迪古乃出得勝口銀朮哥出居庸關婁室爲左翼婆盧火爲右翼取居庸關丁亥次媯州戊子次居庸關庚寅遼統軍都監高六等來送欵上至燕京入自南門使銀朮哥婁室陳于城上乃次于城南遼知樞密院左企弓虞仲文樞密使曹勇義

副使張彥忠參知政事康公弼僉書劉彥宗奉表降辛卯遼百官詣軍門叩頭請罪詔一切釋之壬辰上御德勝殿羣臣稱賀甲午命左企弓等撫定燕京諸州縣詔西京官吏曰乃者師至燕都已皆撫定唯蕭妃與官屬數人遁去已發兵追襲或至彼路可執以來黃龍府叛宗輔討平之

七年正月丁巳遼奚王回鹲保僭稱帝甲子遼平州節度使時立愛降詔曲赦平州又詔諸班勃極烈曰比遣昂徙諸部民人于嶺東而昂悖戾騷動煩擾致多怨叛其違命失衆當寘重典若或有疑禁錮以待庚午詔中

京都統幹論曰聞卿撫定人民各安其業朕甚嘉之回  
离保聚徒逆命汝宜計畫無使滋蔓壬申詔招諭回离  
保癸酉以時立愛言招撫諸部己卯宋使來議燕京西  
京地庚辰宜錦乾顯成川豪懿等州皆降甲申詔曰諸  
州部族歸附日淺民心未寧今農事將興可遣分諭典  
兵之官無縱軍士動擾人民以廢農業二月乙酉朔命  
撤八詔諭興中府降之遼來州節度使田顯隰州刺史  
杜師回遷州刺史高永福潤州刺史張成皆降壬辰詔  
諳班勃極烈曰郡縣今皆撫定有逃散未降者已釋其  
罪更宜招諭之前後起遷戶民去鄉未久豈無懷土之

心可令所在有司深加存恤毋輒有騷動衣食不足者  
官賑貸之癸巳詔曰頃因兵事未息諸路關津絕其往  
來今天下一家若仍禁之非所以便民也自今顯咸東  
京等路往來聽從其使其間被虜及鬻身者並許自贖  
爲良仍令馳驛布告興中宜州復叛宋使趙良嗣來請  
加歲幣以代燕稅及議畫疆與遣使賀正旦生辰置榷  
場交易并計議西京等事癸卯銀朮哥鐸刺如宋乙巳  
詔都統杲曰新附之民有材能者可錄用之戊申詔平  
州官與宋使同分割所與燕京六州之地癸丑大赦是  
月改平州爲南京以張覺爲留守三月甲寅朔將誅昂

以習不失諫杖之七十仍拘泰州戊午都統杲等言耶律麻哲余覩吳十鐸刺等謀叛宜早圖之上召余覩從容謂之曰朕得天下皆我君臣同心同德以成大功固非汝等之力今聞汝等謀叛若誠然耶必須鞍馬甲冑器械之屬當悉付汝朕不食言若再爲我擒無望免死欲留事朕無懷異志吾不汝疑余覩皆戰慄不能對命杖鐸刺七十餘並釋之宋使盧益趙良嗣馬宏以國書來四月丁亥遣幹魯宗望襲遼主于陰山壬辰復書于宋師初入燕遼兵復犯奉聖州林牙大石壁龍門東二十五里都統幹魯聞之遣照立婁室馬和尚等率兵討

之生獲大石悉降其衆癸巳詔曰自今軍事若皆中覆不無留滯應此路事務申都統司餘皆取決樞密院契丹九斤聚黨興中府作亂擒之九斤自殺命習古乃婆盧火監護長勝軍及燕京豪族工匠由松亭關徙之內地已亥次儒州幹魯宗望等襲遼權六院司喝離質于白水濼獲之其宗屬秦王許王等十五人降聞遼主留輜重青塚以兵萬人往應州遣照里背荅宗望婁室銀朮哥等追襲之宗望追及遼主決戰大敗之獲其子趙王習泥烈及傳國璽五月甲寅南京留守張覺據城叛丙寅次野狐嶺己巳次落藜濼幹魯魯等以趙王習泥烈

林牙大石駙馬乳奴等來獻井上所獲國璽宗雋以所  
俘遼主子秦王許王女奧野等來見奚路都統撻懶攻  
速古啜里鐵尼所部十三巖皆平之又遣奚馬和尚攻  
下品達魯古井五院司諸部執其節度乙列回离保爲  
其下所殺辛巳詔諭南京官民六月壬午朔次鴛鴦灤  
是日闔母敗張覺于營州丙申上不豫將還上京命移  
賚勃極烈宗翰爲都統吳勃極烈昱迭勃極烈幹魯副  
之駐兵雲中以備邊己酉次斡獨山驛召諳班勃極烈  
吳乞買七月辛酉次牛山宗翰還軍中八月辛巳朔日  
有食之乙未次渾河北諳班勃極烈吳乞買率宗室百



官上謁戊申上崩于部堵灤西行宮年五十六九月癸丑梓宮至上京乙卯葬宮城西南寧神殿丙辰諡班勃極烈卽皇帝位天會三年三月上尊諡曰武元皇帝廟號太祖立原廟于西京天會十三年二月辛酉改葬和陵立開天啓祚睿德神功之碑于燕京城南嘗所駐蹕之地皇統四年改和陵曰睿陵五年十月增諡應乾興運昭德定功睿神莊孝仁明大聖武元皇帝真元三年十一月改葬于大房山仍號睿陵

贊曰太祖英謨叡略豁達大度知人善任人樂爲用世祖陰有取遼之志是以兄弟相授傳及康宗遂及太祖

臨終以太祖屬穆宗其素志蓋如是也初定東京卽除去遼法減省租稅用本國制度遼主播越宋納歲幣以幽薊武朔等州與宋而置南京于平州宋人終不能守燕代卒之遼主見獲宋主被執雖功成于天會間而規摹運爲實自此始金有天下百十有九年太祖數年之間算無遺策兵無留行底定大業傳之子孫嗚呼雄哉

金史卷二

金史卷二考證

太祖紀國號大金○

臣人龍

按金志太祖以其國產大

金及有金水源故稱爲大金

趙良嗣○

臣人龍

按宋史姦臣傳趙良嗣本燕人馬植

易姓名李良嗣徽宗賜姓趙

遼國和議無成○

臣人龍

按遼史天祚紀遣蕭習泥烈

等冊金主爲東懷國皇帝金以冊文不言大金而云

東懷乃小邦懷其德之義且語涉輕侮故和議無成

遼秦晉國王耶律捏里○遼史捏里名淳

以張覺爲留守○張覺遼史作張毅宋元通鑑亦作張

穀

金史卷二考證

金史卷三

元中書右丞相總裁脫脫等修

本紀第三

太宗

太宗體元應運世德昭功哲惠仁聖文烈皇帝諱晟本  
諱吳乞買世祖第四子母曰翼簡皇后孛懶氏太祖母  
弟也遼太康元年乙卯歲生初爲穆宗養子收國元年  
十月命爲諳班勃極烈太祖征伐常居守天輔五年賜  
詔曰汝惟朕之母弟義均一體是用汝貳我國政凡軍  
事違者閱實其罪從宜處之其餘事無大小一依本朝

舊制天輔七年六月太祖次鴛鴦灤有疾至幹獨山驛  
召赴行在詔曰今遼主盡喪其師奔于夏國遼官特別  
遙設等劫其子雅里而立之已留宗翰等措畫朕親巡  
已久功亦大就所獲州部政須綏撫是用還都八月中  
旬可至春州汝率內戚迎我若至豹子崖尤善八月乙  
未會于渾河北戊申太祖崩九月乙卯葬太祖于宮城  
西國論勃極烈杲鄆王昂宗峻宗幹率宗親百官請正  
帝位不許固請亦不許宗幹率諸弟以赭袍被體寘壘  
懷中丙辰卽皇帝位己未告祀天地丙寅大赦中外改  
天輔七年爲天會元年癸酉發春州粟賑降人之徙于

上京者戊寅詔諸猛安賦米給戶口在內地匱乏者南路軍帥闍母敗張覺于樓峯口十月壬辰詔以空名宣頭百道給西南西北兩路都統宗翰曰今寄爾以方面如當遷授必待奏請恐致稽滯以其便宜從事己亥上京慶元寺僧獻佛骨却之闍母及張覺戰于兔耳山闍母敗績十一月壬子命宗望問闍母罪以其兵討張覺壬戌復以空名宣頭及銀牌給上京路軍帥實古迺婆盧火等癸亥宗望以闍母軍發廣寧下瀕海諸郡縣詔諭南京割武朔二州入于宋婁室破朔州西山擒其帥趙公直勃董幹魯別及勃刺速破走乙室白答於歸化



已巳徙遷潤來隰四州之民于瀋州庚午宗望及張覺戰于南京東大敗之張覺奔宋城中人執其父及二子以獻戮之軍中壬申張忠嗣張敦固以南京降遣使與張敦固入諭城中復殺其使者以叛已卯詔女直人先有附于遼今復虜獲者悉從其所欲居而復之其奴婢部曲皆雖逃背今能復歸者並聽爲民十二月辛巳蠲民間貸息詔以咸州以南蘇復州以北年穀不登其應輸南京軍糧免之甲午詔曰比聞民間乏食至有鬻其子者其聽以丁力等者贖之是日以國論勃極烈杲爲諂班勃極烈宗幹爲國論勃極烈遣勃堇李靖如宋告

哀

二年春正月庚戌朔以謾都訶爲阿捨勃極烈參議國政壬子命賞宗望及將士克南京之功赦闔母罪甲寅以空名宣頭五十銀牌十給宗望戊午詔孛堇完顏阿實賚曰先帝以同姓之人有自鬻及典質其身者命官爲贖今聞尚有未復者其悉閱贖之癸亥以東京比歲不登詔減田租市租之半甲戌西南西北兩路都統宗翰宗望請勿割山西郡縣與宋上曰是違先帝之命也其速與之夏國奉表稱藩以下寨以北陰山以南乙室耶刺部吐祿濼西之地與之丙子貽宋書索俘虜叛亡

丁丑始自京師至南京每五十里置驛二月詔有盜發  
遼諸陵者罪死庚寅詔命給宗翰馬七百疋田種千石  
米七千石以賑新附之民丁酉命徙移懶路都孛堇完  
顏忠于蘇瀕水乙巳詔諭南京官僚小大之事必關白  
軍帥無得專達朝廷丙午宗翰乞濟師詔有司選精兵  
五千給之丁未命宗望凡南京留守及諸闕員可選勲  
賢有人望者就注擬之具姓名官階以聞三月己酉朔  
命宗望以宋歲幣銀絹分賜將士之有功者庚戌叛人  
活孛帶降詔釋之宗望請選良吏招撫遷潤來隰之民  
保山砦者從之己未宗望以南京反覆凡攻取之計乞

與知樞密院事劉彥宗裁決之劉公胄王永福棄家踰城來降以公胄爲廣寧尹永福爲奉先軍節度使辛未夏國王李乾順遣使上誓表閏月戊寅朔賜夏國誓詔辛巳命置驛上京春泰之間己丑烏虎里迪烈底兩部來降丙午旣許割山西諸鎮與宋以宗翰言罷之是月斜野襲遙輦昭古牙走之獲其妻孥羣從及豪族勃堇渾斲等破奚七巖而撫其民人四月己酉以宗翰經略西夏及破遼功賜以十馬使自擇其二餘以分諸帥賑上京路西北路降者及新徙嶺東之人戊午以實古迺所築上京新城名會平州乙亥詔贖上京路新遷寧江

州戶口賣身者六百餘人宋遣使來弔喪以高木僕古等充遺留國信使高興輔劉典嗣等充告卽位國信使如宋五月丁丑朔上京軍帥實古迺以所獲印綬二十二及銀牌來上癸未詔曰新降之民訴訟者衆今方農時或失田業可俟農隙聽決丁亥婆速路猛安僕盧古以賊罷以謀克習泥烈代之乙巳曷懶路軍帥完顏忽刺古等言往者歲捕海狗海東青鴉鶻於高麗之境近以二舟往彼乃以戰艦十四要而擊之盡殺二舟之人奪其兵仗上曰以小故起戰爭甚非所宜今後非奉命母輒往闡母克南京殺都統張敦固七月壬午皇子宗

峻薨丙戌禁外方使介冗從多者壬辰鵲實答言高麗  
納吾叛亡增其邊備必有異圖詔曰納我叛亡而弗歸  
其曲在彼凡有通問毋違常式或來侵略整爾行列與  
之從事敢先犯彼雖捷必罰乙未以烏虎部及諸營叛  
以昃勃極烈昱等討平之八月乙巳朔以孛堇烏爪乃  
等爲賀宋生辰使丁巳撒离改部猛安難思以賊罷以  
奚金家奴代之六部都統撻懶擊走昭古牙殺其隊將  
曷魯燥白撒曷等又破降駱駝山金源興中諸軍詔增  
給銀牌十十月甲辰朔夏國遣使謝誓詔戊午天清節  
宋夏遣使來賀甲子詔發寧江州粟賑泰州民被秋潦

者遙輦昭古牙率衆來降興中府降丙寅詔有司運米五萬石于廣寧以給南京潤州戍卒命南路軍帥闍母以甲士千人益合蘇館路孛堇完顏阿實賚以備高麗戊辰西南西北兩路權都統幹魯言遼詳穩撻不野來奔言耶律大石自稱爲王置南北官屬有戰馬萬疋遼主從者不過四千戶有步騎萬餘欲趨天德駐余睹谷詔曰追襲遼主必酌事宜其討大石則俟報下十一月癸未闍母下宜州拔欂桷山殺節度使韓慶民癸卯詔以米五萬石給撻懶實古迺十二月戊申以孛堇高居慶等爲賀宋正旦使

三年正月癸酉朔宋夏遣使來賀戊子同知宣徽院事  
韓資正加尚書左僕射爲諸宮都部署乙未夏國遣使  
奠幣及賀卽位宋遣使賀卽位二月壬戌婁室獲遼主  
于余睹谷丁卯以厖葛城地分授所徙烏虎里迪烈二  
部及契丹民三月乙亥阿捨勃極烈謾都訶薨丙子賑  
奚契丹新附之民辛巳建乾元殿韓魯獻傳國寶以謀  
葛失來附請授印綬是日賜完顏婁室鐵券四月壬寅  
朔詔以遼主赴京師丁巳南路軍帥察刺以罪罷五月  
己丑蕭八斤獲遼玉寶來獻六月庚申以獲遼主遣李  
用和等充告慶使如宋七月壬申禁內外官宗室毋私



役百姓已卯南京帥以錦州野蠶成蠶奉其絲綿來獻命賞其長吏詔權勢之家毋買貧民爲奴其脅買者一人償十五人詐買者一人償二人皆杖一百甲申詔南京括官豪牧馬以等第取之分給諸軍以耶律固等爲宋報謝使八月癸卯幹魯以遼主至京師甲辰告于太祖廟丙午遼主延禧入見降封海濱王壬子詔有司揀閱善射勇健之士以備宋九月壬午廣寧府獻嘉禾癸巳保州路都孛堇加古撒曷有罪伏誅以孛堇徒單烏烈代之十月甲辰詔諸將伐宋以諳班勃極烈杲兼領都元帥移賚勃極烈宗翰兼左副元帥先鋒經略使完

顏希尹爲元帥右監軍左金吾上將軍耶律余睹爲元帥右都監自西京入太原六部路軍帥撻懶爲六部路都統斜也副之宗望爲南京路都統閣母副之知樞密院事劉彥宗兼領漢軍都統自南京入燕山詔建太祖廟于西京召耶魯赴京師教授女直字戊申有司言權南路軍帥鶻寶荅官吏貪縱詔鞠之壬子天清節宋夏遣使來賀丁巳以閣母爲南京路都統埽喝副之宗望爲閣母劉彥宗兩軍監戰壬戌詔曰今大有年無儲蓄則何以備饑饉其令牛一具賦粟一石每謀克爲一廩貯之宋易州成將韓民毅以軍降處之蔚州十一月庚

辰以降封遼主爲海濱王詔中外辛卯南路軍帥司請  
禁契丹奚漢人挾兵器詔勿禁以張忠嗣權簽南京中  
書樞密院事十二月庚子宗翰下朔州甲辰宗望諸軍  
及宋郭藥師張企徽劉舜仁戰于白河大破之蒲莧敗  
宋兵于古北口丙午郭藥師降燕山州縣悉平戊申宗  
翰克代州乙卯中山降丙辰宗望破宋兵五千于真定  
戊午宗翰圍太原耶律余睹破宋河東陝西援兵子汾  
河北甲子宗望克信德府

四年春正月丁卯朔始朝日降臣郭藥師董才皆賜姓  
完顏氏戊辰宗弼取湯陰大臭攻下濬州迪古補取黎

陽巳巳諸軍渡河庚午取滑州宗望使吳孝民等入汴  
問宋取首謀平山童貫譚稹詹度及張覺等宋太上皇  
帝出奔癸酉諸軍圍汴甲戌宋使李稅來謝罪且請修  
好宗望許宋修好約質割三鎮地增歲幣載書稱伯姪  
戊寅宋以康王構少宰張邦昌爲質辛巳宋上誓書地  
圖稱姪大宋皇帝伯大金皇帝癸未諸軍解圍二月丁  
酉朔夜宋將姚平仲兵四十萬來襲宗望營敗之巳亥  
復進師圍汴宋使宇文虛中以書來攻以肅王樞爲質  
遣康王構歸師還壬子以滑濬二州與宋宗翰定威勝  
軍攻下隆德府丁巳次澤州海濱王家奴誣其主欲亡

去詔誅其首惡餘並杖之三月癸未銀朮可圍太原宗翰還西京四月癸卯宗望使宗弼來奏捷乙丑耿守忠等大敗宋人于西都谷五月辛未宋种師中以兵出井陘癸酉完顏活女敗之于殺熊嶺斬師中於陣是日拔离速敗宋姚古軍於隆州谷六月丙申朔高麗國王王楷奉表稱藩庚戌宗望獻所獲三象庚申以宗望爲右副元帥七月丙寅遣高伯淑等宣諭高麗壬申出金牌命孛堇大臭以所領渤海軍八猛安爲萬戶戊子以鐵勒部長奪离刺不從其兄夔里本叛賜馬十一豕百錢五百萬蕭仲恭使宋還以所持宋帝與耶律余睹蠟書

自陳八月庚子詔左副元帥宗翰右副元帥宗望伐宋  
宋張灝率兵出汾州拔離速擊走之劉臻以兵出壽陽  
婁室破之庚戌宗翰伐西京辛亥婁室等破宋張灝軍  
于文水癸丑宗望發保州是日耶律鐸破宋兵于雄州  
那野等敗宋兵于中山甲寅新城縣進白烏庚申突撚  
取新樂九月丙寅宗翰克太原執經略使張孝純鶻沙  
虎取平遙靈石孝義介休諸縣已巳復以南京爲平州  
辛未宗望破宋种師閔軍於井陘取天威軍克眞定殺  
其守李邈十月婁室克汾州石州降蒲察克平定軍遼  
州降丁未天清節高麗夏遣使來賀中京進嘉禾十一

月甲子宗翰自太原趨汴丙寅宗望自真定趨汴戊辰宗翰下威勝軍癸酉撒刺荅破天井關乙亥宗翰克隆德府活女渡盟津西京永安軍鄭州皆降庚辰宗翰克澤州宗望諸軍渡河臨河大名二縣德清軍開德府皆下丙戌克懷州是日宗望至汴閏月壬辰朔宋出兵拒戰宗望等擊敗之癸巳宗翰至汴丙辰克汴城庚申以高隨充高麗生日使辛酉宋主桓出居青城十二月癸亥宋主桓降是日歸于汴城庚辰詔曰朕惟國家四境雖遠而兵革未息田野雖廣而畎畝未闢百工略備而祿秩未均方貢僅修而賓館未贍是皆出乎民力苟不

務本業而抑游手欲上下皆足其可得乎其令所在長吏敦勸農功

五年正月辛卯朔高麗王遣使來賀癸巳宗翰宗望使使以宋降表來上乙未知樞密院事劉彥宗上表請復立趙氏不聽丁巳回鶻喝里可汗遣使入貢二月丙寅詔降宋二帝爲庶人三月丁酉立宋少宰張邦昌爲大楚皇帝割地賜夏國四月乙酉克陝府取虢州丙戌以六部路都統撻懶爲元帥左監軍南京路都統闍母爲元帥左都監宗翰宗望以宋二帝歸己丑詔曰合蘇館諸部與新附人民其在降附之後同姓爲婚者離之五



月庚寅朔宋康王構卽位於歸德宋殺張邦昌婁室降  
解絳慈隰石河中岢嵐寧化保德火山諸城撻懶徇地  
山東下密州迪虎下單州廣信軍降六月庚申詔曰自  
河之北今旣分畫重念其民或見城邑有被殘者不無  
疑懼遂命堅守若卽討伐生靈可愍其申論以理招輯  
安全之儻執不移自當致討若諸軍敢利於俘掠輒肆  
蕩毀者底于罰庚辰右副元帥宗望薨漢國王宗傑繼  
薨七月甲午賜宗翰劵書除叛逆外咸貫勿論以石州  
戍將烏虎棄城喪師杖之削其官八月戊寅以宋捷遣  
耶律居謹等充宣慶使使高麗丙戌以宗輔爲右副元

帥詔曰河北河東郡縣職員多闕宜開貢舉取士以安  
新民其南北進士各以所業試之九月丁未詔曰內地  
諸路每耕牛一具賦粟五斗以備歉歲辛亥賜元帥右  
監軍完顏希尹萬戶銀朮可券書除赦所不原餘並勿  
論闍母取河間大敗宋兵于莫州雄州降撻懶克祁州  
永寧軍保州順安軍皆降冬十月丁卯沙州回鶻活刺  
散可汗遣使入貢辛未天清節高麗夏遣使來賀宋二  
帝自燕徙居于中京十二月丙寅右副元帥宗輔伐宋  
徇地淄青烏林荅泰欲敗宋將李成于淄州趙州降阿  
里刮徇地滑州敗敵兵遂取滑州乙亥西南路都統幹

魯薨已卯賽里下汝州

六年正月丙戌朔高麗夏遣使來賀宗弼破宋鄭宗孟  
軍于青州銀朮可取鄧州薩謀魯入襄陽拔离速入均  
州馬五取房州癸巳克青州癸卯闔母克濰州丁未迪  
古補敗宋將趙子昉兵撒离喝敗宋兵于河上甲寅宋  
將馬括兵次樂安宗輔擊敗之聞宋主在維揚以農時  
還師宗弼敗宋兵于河上二月乙卯朔拔离速取唐州  
癸亥取蔡州已巳移刺古敗宋將臺宗雋等兵于大名  
庚午再破其軍獲臺宗雋及宋忠甲戌拔离速取陳州  
癸未克穎昌府鄭州叛入于宋復取鄭州遷洛陽襄陽

穎昌汝鄭均房唐鄧陳蔡之民于河北宗翰復遣婁室  
攻下同華京兆鳳翔擒宋經制使傅亮阿隣破河中幹  
魯入馮翊三月壬辰命南路軍帥實古迺籍節度使完  
顏慎思所領諸部及未置猛安謀克戶來上巳酉撻懶  
下恩州五月戊戌移沙土古思以本部來附六月己未  
詔求祖宗遺事撻懶遣兵徇下磁州信德府真定賊自  
稱元帥秦王撒离喝討平之七月乙巳宋王遣使奉表  
請和詔進兵伐之以宋二庶人赴上京八月乙卯婁室  
敗宋兵于華州訛特刺破敵于渭水遂取下邽丁丑以  
宋二庶人素服見太祖廟遂入見于乾元殿封其父昏

德公子重昏侯是日告于太祖廟以州郡職員名稱及俸給因革詔中外九月辛丑繩果等敗宋兵于蒲城甲辰又破敵于同州乙丑取丹州十月丙寅天清節高麗夏遣使來賀癸酉知樞密院事劉彥宗薨丁丑蒲察婁室敗宋兵于臨真戊寅徙昏德公重昏侯于韓州庚辰宗翰宗輔會于濮伐宋十一月庚寅蒲察婁室取延安府壬辰賑移懶路乙未取濮州綏德軍降婁室再攻晉寧軍其守徐徽言固守不能克十二月丙辰宗弼取開德府丁卯宗輔克大名府鵠沙虎敗宋兵于鞏

七年正月庚辰朔高麗夏遣使來賀辛巳吳國王闍母

薨甲午以南京留守韓企先同中書門下平章事知樞  
密院事二月戊辰宋麟府路安撫使折可求以麟府豐  
三州降已巳婁室塞里鶻沙虎等破晉寧軍其守徐徽  
言據子城拒戰庚午率衆潰圍走擒之使之拜不拜臨  
之以兵不動命降將折可求諭之降指可求大罵出不  
遜語遂殺之其統制孫昂及士卒皆不屈盡殺之甲戌  
詔禁醫巫閻山遼代山陵樵採三月己卯朔日中有黑  
子壬寅詔軍興以來良人被略爲驅者聽其父母夫妻  
子贖之尚書左僕射高真罷四月蒲察婁室取鄜坊二  
州五月乙卯拔离速等襲宋主于揚州九月丙午朔日

有食之庚午宗弼敗宋兵于睢陽辛未降其城是月曹州降十月丙子朔京兆府降丁丑鞏州降庚寅天清節高麗夏遣使來賀丁酉阿里當海大臭破敵于壽春己亥安撫使馬世元以城降甲辰廬州降十一月庚戌徙曷蘇館都統司治寧州乙卯高麗遣使來貢丙辰宗弼取和州壬戌宗弼渡江敗宋副元帥杜充軍于江寧丁卯守臣陳邦光以城降十二月丙戌宗弼取湖州丁亥克杭州阿里蒲盧渾追宋主于明州越州降大臭敗宋樞密使周望于秀州又敗宋兵于杭州東北戊戌阿里蒲盧渾敗宋兵于東關遂濟曹娥江壬寅敗宋兵于高

橋宋主入于海

八年正月甲辰朔高麗夏遣使來賀丁巳以同中書門  
下平章事韓企先爲尚書左僕射兼侍中己未阿里蒲  
盧渾克明州執其守臣趙伯諤庚申詔曰避役之民以  
徼直鬻身權貴之家者悉出還本貫阿魯補斜里也下  
太平順昌及濠州是月宋副元帥杜充以其衆降二月  
乙亥宗弼還自杭州庚寅取秀州戊戌取平江汴京亂  
三月丁卯大迪里復取之宗弼及宋韓世忠戰于鎮江  
不利四月丙申復戰于江寧敗之諸軍渡江是日阿魯  
補戰于拓臯己亥周企戰于壽春辛丑婁室戰于淳化



皆勝之醴州降遂克邠州五月癸卯禁私度僧尼及繼父繼母之男女無相嫁娶戊申詔曰河北河東簽軍其家屬流寓河南被俘掠爲奴婢者官爲贖之俾復其業六月壬申詔遣遼統軍使耶律曷禮質節度使蕭別離刺等十人分治新附州鎮癸酉詔以昏德公六女爲宗婦七月辛亥詔給泰州都統婆盧火所部諸謀克甲冑各五十先遣婁室經略陝西所下城邑叛服不常其監戰阿盧補請益兵帥府會諸將議曰兵威非不足綏懷之道有所未盡誠得位望隆重恩威兼濟者以往可指日而定若以皇子右副元帥宗輔往爲宜以聞詔曰婁

室往者所向輒克今使專征陝西淹延未定豈倦于兵而自愛耶關陝重地卿等其戮力焉丁卯上如東京溫湯徙昏德公重昏侯于鶻里改路九月戊申立劉豫爲大齊皇帝世修子禮都大名府辛酉諳班勃極烈都元帥杲薨癸亥宗輔等敗宋張浚軍于富平耀州降乙丑鳳翔府降十月乙亥上至自東京齊帝劉豫遣使謝封冊甲申天清節齊高麗夏遣使來賀以鐵驪突离刺同中書門下平章事詔遼宋官上本國詰命等第換授十一月甲辰宗輔下涇州丁未渭州降敗宋劉倪軍于瓦亭戊申原州降宋涇原路統制張中孚知鎮戎軍李彥

琦以衆降馬五等擊宋吳玠軍于隴州庚戌以遙鎮節  
度使烏克壽等爲齊劉豫生日使癸亥宗輔以陝西事  
狀聞詔獎諭之十二月丁丑完顏婁室薨乙酉宗輔敗  
宋劉維輔軍壬辰熙州降

九年正月己亥朔齊高麗夏遣使來賀戊申命以徒門  
水以西渾曠星顯倭蠡三水以北閑田給曷懶路諸謀  
克辛亥蒲察鶻拔魯完顏忒里討張萬敵于白馬湖陷  
于敵癸丑以同中書門下平章事時立愛爲侍中知樞  
密院張忠嗣爲宣政殿大學士知三司使事宗弼阿盧  
補撫定鞏洮河樂西寧蘭廓積石等州涇原熙河兩路

皆平四月己卯詔新徙戍邊戶匱于衣食有典質其親屬奴婢者官爲贖之戶計其口而有二三三者以官奴婢益之使戶爲四口又乏耕牛者給以官牛別委官勸督田作戍戶及邊軍資糧不繼糴粟于民而與賑卹其績遷戍戶在中路者姑止之卽其地種藝俟畢穫而行及來春農時以至戍所五月丙午分遣使者諸路勸農六月壬辰賜昏德公重昏侯時服各兩襲八月辛巳回鶻隈欲遣使來貢九月己酉和州回鶻執耶律大石之黨撒八迪里突迭來獻十月戊寅天清節齊高麗夏遣使來賀撒离喝攻下慶陽慕洧以環州降宗弼與宋吳玠

金史卷三十一 本紀 十一  
戰于和尚原敗績十一月己未遷趙氏疎屬于上京以  
陝西地賜齊

十年正月癸巳朔齊高麗夏遣使來賀己酉齊表謝賜  
地壬子詔曰昔遼人分士庶之族賦役皆有等差其悉  
均之二月庚午賑上京路戍邊猛安民四月丁卯詔諸  
良人知情嫁奴者聽如故爲妻其不知而嫁者去住悉  
從所欲移資勃極烈左副元帥宗翰朝京師庚午以太  
祖孫亶爲諳班勃極烈皇子宗磐爲國論忽魯勃極烈  
國論勃極烈宗幹爲國論左勃極烈移資勃極烈左副  
元帥宗翰爲國論右勃極烈兼都元帥右副元帥宗輔

爲左副元帥庚寅閏鴨綠混同江暴漲命賑徙戍邊戶  
在混同江者閏月辛卯詔分遣鶻沙虎等十二人閱諸  
路丁壯調赴軍七月甲午賑泰州路戍邊戶上如中京  
九月元帥右都監耶律余睹謀反出奔其黨燕京統軍  
使蕭高六伏誅蔚州節度使蕭特謀葛白殺十月壬寅  
天清節大赦齊高麗夏遣使來賀上如興中府齊使使  
來告母喪十一月癸亥以武良謨爲齊弔祭使癸未撒  
離喝請取劔外十三州從之部族節度使土古廝捕斬  
余睹及其諸子函其首來獻十二月庚子撒離喝克金  
州上至自興中府

十一年正月丁巳朔齊高麗夏遣使來賀丁卯撒鹵噶  
敗吳玠于饒峰關戊辰取洋州甲戌入興元府二月己  
亥元帥府言承詔賑軍士臣恐有司錢幣將不繼請自  
元帥以下有祿者出錢助給之詔曰官有府庫而取於  
臣下此何理耶其悉從官給八月甲申黃龍府置錢帛  
司戊子趙禔誣告其父昏德公謀反禔及其壻劉文彥  
伏誅戊戌詔曰比以軍旅未定嘗命帥府自擇人授官  
今並從朝廷選注十月丙申天清節齊高麗夏遣使來  
賀十一月丙寅賑移懶路宗弼克和尚原十二月癸未  
賑曷懶路

十二年正月辛亥朔齊高麗夏遣使來賀甲子初改定  
制度詔中外丙寅如東京二月丁酉撒離喝敗宋吳玠  
軍于固鎮四月至自東京六月甲午以阿盧補爲元帥  
右都監十月庚寅天清節齊高麗夏遣使來賀

十三年正月丙午朔日有食之己巳上崩于明德宮年  
六十一庚午諡班勃極烈卽皇帝位于柩前三月庚辰  
上尊諡曰文烈皇帝廟號太宗乙酉葬和陵皇統四年  
改號恭陵五年增上尊諡曰體元應運世德昭功哲惠  
仁聖文烈皇帝真元三年十一月戊申改葬于大房山  
仍號恭陵



贊曰天輔草創未遑禮樂之事太宗以斜也宗幹知國  
政以宗翰宗望總戎事既滅遼舉宋卽議禮制度治歷  
明時續以武功述以文事經國規摹至是始定在位十  
三年宮室苑籞無所增益未聽大臣計傳位熙宗使太  
祖世嗣不失正緒可謂行其所甚難矣

金史卷三